

In Ta'nin Paul-di In Rome Búu'úwi Méesate'in T'owa Ovâyta'nannin

¹ Naa Paul omuu'i?, Jesus Christ-gî? dáy't'ôe'o'ídi ná'in ta'nin wâysande? un Rome búu'ú iwe íthaa'in. Yôesi Tádádí naa díde?man hedá dísaanígí? dísóge iví híwó'di tuu t'owa dovâyt'ôe?ámídí. ² Hăn'oebo Yôesi natú ná'i híwó'di tuu na'in dímääni'in, hedí iví tukhe?min iví ta'nin diwe i dâyta?nan. ³⁻⁴ Iví ay Jesus Christ na'inbí tsondi hay'i gínmuu'iví?gedí dâyta?nan. Na'aypuyä ihaydi nat'owasenpaa, hedí iví thehtáy pahpâa David i hăn'oe'i tsondi namuu'iví tí'úugé kâ?ää'inbí?wediho na'aypuyä. Hedí Jesus nachuudi nawáywówápóe ihaydi i Yä'dâa'i P'oewaahâadi dínkeeyan ta'gendi Yôesi Tádáví ay wá? ûnmuu'in. ⁵ Háa Jesus i'an waa namuudi Yôesi Tádá navi?piye? híwó'di namuu, hedího in Hudíyo dimuupí'in t'owa wéngé t'ähkí dithaa'inbí?piyeho naa dísan dovâykhäge?namídí iví tuu ipiye? dívíwhäyú-ídi hedá ôn'a'ginnamídá. Kin dáy'o? hedânho t'owadi óetegé-ídi. ⁶ Hedá un wá? Yôesi Tádádí wovâytukánnan Jesus Christ-ví'in ímúnídí.

⁷ Hedího un t'ähkí oe Rome íkw'ó'nin wâysengitumáa. Yôesi Tádádí wovâyséegi hedá wovâyde?man iví t'owa ímúnídí. Idá hedá Na'inbí Sedó Jesus Christ-dídá séegísehkanä wovâyääni hedá wovâykhäge?namí ánsaaginpidíbo? íkwó'nídí.

Paul oe Rome-piye? napunda?

8 Hedi nää-á häädi Jesus Christ dóhéé'an ginhay-á Yôesi naví Tádá dókú'daa'o' un t'ähki ímuudi, gá wéngé t'ähki t'owa dívíhí'máadân unbí whäyu i'gedi. ⁹⁻¹⁰ Yôesi Tádá-áho ûnhanginná ná'i naa otû'di ta'gen namuu'in. Igi' pín ta'ge haydi dáy't'òemáa t'owa dovâytu'odi i híwó'di tuu iví ay Jesus-ví'gedi, hedi häädi wänbo t'ähki wâyüüusu'o'. Yôesi dóda'máa i-á natúdáho hanwaapídíbo unbí'piye' dípunmääni, ¹¹ gá hânho o'ádâapunda'dân. Naa oda' hääwí i Yä'dâa'i P'oewâahâadi naa díhá'andi' wâyphadé-í'in, hedânho unbí whäyu shánkího únkay-ídi. ¹² Kinnân otu'da': Undádí naa-ádí wé'ge ívíkhäge'namí kwee waa sen waa gi'âanídí, handa' ívíwhäyundedi.

¹³ Tí'úuwín páadé'in, oda' ûnhanginnání'in hâyân wänbo dáy'ânshaamáa omú-ídi unbí'piye', hewänbo häädi waa hääwídi dí'ahkhände'. Hânho oda' báyékidí unbí búu'úwin Jesus-ví'piye' dovâywhäyu'amí'in, in wé'ge'in Hudíyo dimuupí'in t'owa dovâywhäyu'an waagibá. ¹⁴⁻¹⁵ Naa t'ähki t'owa hääwí ophaamuu waagibá ochaa, tobá háawin dimúni wänbo', in Greek tuudi dívíhéé'o'indá in pí'wí tuudi dívíhéé'o'indá, in hânho dihá'indá in diháhpí'indá, gá Yôesidi naa dísógedân iví híwó'di tuu t'ähki t'owa dovây't'òe'amídi. Hedânho shánkí oda' un oe Rome diwe íkw'ó'nin wá' wây't'òe'amí'in.

Yôesi Tádávi híwó'di tuu-á únkay

¹⁶ Yôesi Tádávi híwó'di tuudi naa wídiwóda'máhpí. Ná'i tuu-ân nakay, hedi i'gedi Yôesidi t'ähki t'owa in ipiye' dívíwhäyunde'in ovây'aywonde', páadé in Hudíyo dimuu'indá,

hedá in Hudíyo dimuupí'indá wá'. 17 Nă'i híwó'di tuudi dihá'andi gínhanginná háa Yôesi Tádádí t'owa ovâychaamáa'in t'aywó'di dâymáapí waagi. Hewänbo inbí whäyü dínmuu'idida' kin i'o', hääwí híwó'di díví'o'i namuudá yoe, iví tą'nin diwe ûnta'muu waagi:

Wí to'wí Yôesiví'piye' ta'gendi iwhâyundedáho',
 iví whäyü ûnmuudibo Yôesidi óechaamáa
 t'aywó'di imáapí waagi,
 hedí wówátsi óemääní.

Yôesi Tádádí wên t'owa ovâytechänukhâymaa

18 Yôesi Tádá oe makówá na'ándidi dínkeeyo' ovâytechänukhâymaa'in in to'wên óe'a'ginpí'indá hedá in yă'dâapí' díví'o'indá, háa díví'o'in namuudi nat'aydi. Hedí híwó'pí díví'odibo Yôesiví ta'gen ûnmuu'in ônkaayo hedânho wé'ge'in t'owa wídâytáa-ípídí. 19 Dínkoedi híwó' dínhanginnánidí Yôesiví'gedi, gá idi ovâyhangin'ânnandân. 20 Yôesi Tádá pinnán kay imáa hánhay wänbo nahándepí'in, hedí ida' Yôesi namuu hánhay nanân wänbo'. Tobá tséedí Yôesi âymúndepí wänbo', nă'i nan oepáa ikhíyé ihaydi waabo' thay'eedi nă'i hääwí gínhanginná iví'gedi i hääwí ipaa'idi. Hedânkun t'owa wídínkoedipí ditúnidí wídínhanginnáhpí'in.

21 Hewänbo tobá Yôesiví'gedi t'owa dínhanginnân wänbo', óe'a'ginnamíví'wedi hedíháa óekú'daa'amíví'wedi dínkhây'ä' waagi, inbí ánskaa wídínchä'muupí hedá inbí hangintandá dâymáapídí khuu i'gebo diyí'. 22 Báyéki dihá kin di'ánde', hewänbo hanginta'hpí'inda' dimuu. 23 Tobá Yôesi-á t'ähkívi kw'áye namuu wänbo', hedá iví wówátsi-á hánhay wänbo wí'ûnhándepí,

nă'in t'owađáho wíyá wí'óe'a'ginmähpi; hedi tobá Yôesi nachu'pí wänbo hedá t'owa-á dit'ahánde wänbo', báyékí hääwí t'owa waabá dínchaa'in dáykhíyé inbí yôesi dínmúnídí, hedá báyékí wíyá hääwí-á dâypaa, tsídé-á p'oekanu-á hääpandá pãäyu-á waagá dínchaa'i', hedi nă'i hääwí dâypaa'i wá' dâya'ginmä'.

24 Hediho Yôesidi ovâyoe'o' díví'amídí nă'i yä'dâapî' inbí pí'nă kó'yédí dikanda'i', hedi wôeda'ginpídí yä'dâapî' hääwí wí'nă táyedi inbí túu'údí dívítsiye'o'. 25 Wíyá wídívít'óyandepí in ta'gen namuu'in Yôesiví'gedi, hedi i hôeyó namuu'ida' dívíwhäyunde'. I hääwí Yôesi ikhíyé'ida' dâya'ginmä' hedá ipiye' dívíyúusu'o', Yôesiví'piyá yoe, i-á nă'i hääwí ikhíyé'i namuu. Ida'mân hay'i namuu kin t'owa dínkhây'ä' häädi wänbo t'ähkí ditúní'in. Hamân.

26 Hedi in t'owa nă'i yä'dâapíkan díví'o'indá Yôesidi ovâyoe'o' i wôeda'wó'gí hääwí hânho dikanda'i wíyá díví'âamídí. In kwiya' wänbo háa inbí wówátsi thaa dínmúní waagi wídithaapí, hedá wây-á kwiya'dádí inbí túu'údí dívít'aywó'kanmáa. 27 Hedi in senä' wá' han waagibá dívíkanhon. Inbí kweeyôe-ádí dívítháye'bé-íví'wedi dínkhây'ä' waagi, shánkídí dida' wây-á senä'dádí inbí túu'údí dívít'aywó'kanmá've-í'in. Hedi nă'in senä' wôeda'wó'gí wí'nă táyedi dívítsiye'odi i tuchänu dín'ä'i ovâymä', hedi inbí t'aywó'di dínmuudi inbí túu'ú dâypede'e'o'.

28 Dichanpo' wínachä'muupi'in Yôesiví'gedi ta'ge díví'ánshaa'âamídí, hediho Yôesidi ovâyoe'o' inbí yä'dâapî' ánshaa-ádí, i hääwí dínkankhây'ä'hpí'

díví'amídí. ²⁹ Yä'dâapí'-ádí híwó'pí'-ádída' inbí píná khó'yé dinto'on; hânho diha't'aa; wây-á to'wêndáda háa'wânbo-á dimuu; hânho dithúut'óe; háädi wânbo t'ähkí dit'owat'akhanuda'; hânho dívit'aymáa; háädi wânbo t'ähkí díví'hôeyómáa; wây-á t'owaví'gedi yanákí díví'anshaamáa hedá díví'hímáa; ³⁰ t'owa dâytusúu'o'; Yôesi dâyt'ay; t'owa t'ämägi' dâytumáa; dívíyengi; dívípiphuude'; wíyá shánkí t'aywó'di ts'aabi i'gedi díví'anshaamáa díví'amídí; inbí táda-á yíyá-á wídâyt'óyandepí; ³¹ inbí ánshaa-á wídínchä'muupí; háa dívítu'an waa wídíví'opí; inbí maatu'indá wídâyseégípí; wây-á to'wênbí'piye' wídí'iyapo'pí. ³² Yôesi natsonpóe in to'wên ha'wâa díví'o'indá dínkhây'ä' diháani'in, hewânbo ná'i dínhanginnân wânbo handa' dívíkanhon, hedá há'ida'ba yoe, ovâyhi'an wây-á to'wên hanbá díví'amídí.

2

Na'indá wígínk'óepí gitúnídí t'owaví'gedi háa dín'ä'in

¹ Hedího wí to'wídí wây-á t'owa ovâytuusúu'odi natú' t'aywó'to'in dimuu'in, i-á há'to ûnkoedí-í natúní'in wí'bo wí'it'aywó'nanpí'in, tobá to'wí namúní wânbo'. In wé'ge'inbí'gedi kin waagi ihée'odi, wí'bo iví t'aywó'di ipikeekw'óe'ó, gá in waagibá it'aywó'dodân. ² Hedí gínhanginná Yôesi híwó' i'o'in in t'owa kin díví'o'in ovâytouchänudi, gá i-á ûnhanginnândân ta'gendi háawin dimuu'in. ³ Ná'i to'wídí wây-á to'wên ovâytuusúu'odi hewânbo in waagibá it'aywó'dodi ma'di na'ánde Yôesidi há'to óetuchänú-i'in. ⁴ Hedá wá' tobá Yôesi

na'inbí'piye' híwó'di namuu wänbo hedá hânho nabo'atã wänbo-á, ma'di ná'i to'wí na'ánde hääbo wínamuupí'in. Ti wí'ûnhanginnáhpí'an Yôesi í-ádi híwó'di namuu'in, gá Yôesi nada'dân ná'i to'wí iví t'aywó'di iyoe'amí'in?

⁵ Hewanbo t'óyanpí'da? namuudi hedá iví t'aywó'di iyoe'angepí, iví tuchänu shánkí pín'aywó'nin ûnmúni owáy Yôesidi t'owa ovây tuchänu ihaydi, inbí t'aywó'di dínmuudi nat'aydi. Ihaydá Yôesi in t'owa ovâyta'gekeekw'ôení háa híwó' háa híwó'pí díví'annin. ⁶ Wëndá híwó' íví'o?, hedá wëndá híwó'pí íví'o?, hedí Yôesidi na'in wí'inbo dímäáni hääwí gín'ä'i?. ⁷ Wáy wên t'owa-á häädi wänbo t'ähkí híwó' dívíkanhon, hedí dida' Yôesidi ovâytege-í'in hedá híwó' ovây má've-í'in, hedá dida' hânhay wänbo t'ähkí diwówáyêeni'in. Ná'in t'owa-á Yôesidi wówátsi nahánde pí'in ovây mäáni. ⁸ Wây-á t'owa-á dihääkhâdá ingí'da? hääwí t'ähkí dikanda?, hedí Yôesiví ta'gen ûnmuu'in wí'ôn'a'ginpí, hewänbo shánkídí in yä'dâapí'in namuu'in dívíkanhon. Kí'min t'owa-áho Yôesidi ovây tuchänukhây máa, indádi nat'aydi. ⁹ To'wên t'ähkí dívíyä'dâapítsiye'annindá wí'inbo báyéki t'ôephade dínpuwí, páadé in Hudíyo dimuu'indá, hewänbo wá' in Hudíyo dimuupí'indá. ¹⁰ Hewänbo in t'owa híwó' díví'annindá Yôesidi ovâytege-í hedá híwó' ovây má've-í, hedá híhchan ánskaa-á ovây mäáni, páadé in Hudíyo dimuu'indá, hewänbo wá' in Hudíyo dimuupí'indá, ¹¹ gá Yôesidá t'ähkí t'owa handá' ovây máadân.

Yôesi Tádádä'mân ûnk'óe natúnídí t'owaví'gedí

háa dín'ä'in

12 In Hudíyo dimuupí'in wídâytaapí i tsontu Moses ita'nandi, hewänbo dívít'aywó'dodibo ovâytechänú-í tobá i tsontu dâymáapí wänbo. Hedá in Hudíyo-á ná'i tsontu-á dâyta wänbo, dívít'aywó'dodibo i tsontu dá inbí t'aywó'di dínmuu'i ovâykeekw'ôení. 13 In to'wên Yôesiví tsontu dâya'a'ginnannindáho Yôesidi ovâychamáa t'aywó'di wídâytaapí waagi, in to'wên diwänpit'o'inda'ba yoe. 14 Tobá in Hudíyo dimuupí'in Moses-ví tsontu dâymáapí wänbo, háa ná'i tsontu natû' waagi wí'bo díví'odá, kindidi nakeepo' ho dínhanginná'nin háa híwó'di namuu'in hedá háa híwó'di namuupí'indá, 15 hedího háa díví'o'in namuudi nakeepo' i tsontu Moses ita'nandibá inbí ánskaa iwebo dâymáa'in, hedí inbí pí'ná kó'yé wá' ditaachanpo' háa híwó' díví'o'in háa yoe. 16 Hedího i thaa napówa-í Yôesi Tádádí t'ähki t'owa ovâykeekw'ôenídí háa híwó' háa híwó'pí díví'annin, tobá kaadi díví'an wänbo. Hedí Christ Jesus-áho i namuu óesóge'i kin ovaytu'amídi. Kindá ihayda' t'owa dovâytu'o', Yôesiví híwó'di tuu dovây't'ôe'odi.

In Hudíyo-ádí Yôesiví tsontu ûnmuu'i-ádí

17 Ma'di wí to'wí wí'bo iví'gedi ihí'máadi natû' wí kodí'di Hudíyo namuu'in, hedí na'ánde Moses-ví tsontu itaadibo' ôn'aywoení'in, hedí iyêngihée'odi natû' Yôesi óe'a'ginnmä'in. 18 I-á ûnhanginná háa Yôesi nada'in i'amí'in, hedá ûnhanginná wá' wé'i wí yä'dâa'i namuu'in wé'i wí yä'dâapí' namuu'indá gá Yôesiví tsontu iwedi nahâpóedân, 19 hedího na'ánde' ovâypahûwí'in

in to²wên tsí²t'aa'in waagi²inbá dimuu²in, Yôesiví²gedi wí²dínhanginnáhpídí, hedá in to²wên phahkhüü ee dikw'ó²ningí²-á wí kohthay waagibá namuu gin na²ánde². ²⁰ Hedá wá² nada² in to²wên Yôesiví²gedi háäbo wí²dínhanginnáhpí²in ovâyháäwíthayyámí²in, hedá in to²wên áyyää waagi²inbá dimuu²in ovâyhá²ámí, gá ná²i tsontüü imáa²in diwedi ûnhanginnândân t'âhkí in ta²gen namuu²in. ²¹ Idi pí²wên t'owa ovâyhá²o², hedi háadan i-á wí²bo wí²ipihá²opí? Idi ovây²tumakhe²o wí²dívísä²mamípídí, hedi háadan i isä²'bo²? ²² Wây-á t'owa ovây²tu²o wíyá to²wíví sedó-ádí háa kwiyo-ádí wí²dívíw²hohkwomá²ve-ípí gin, hedi háadan i-á wí²bo kinbá it'aywó²do²? I natü² it'ay²in i háäwí t'owa dâ²khíyé²i² inbí yôesi dínmuu waa dâ²chä²i², hedi háadan i-á ná²i háäwí²bá isä²'bo² i tewhá wáyyé nakw'ó² deeye? ²³ Iphuudedi natü² Yôesiví tsontüü itaa²in, hedi háadan ná²i tsontüü i²a²gindopídí Yôesi wôeda² iwe óesógénde²? ²⁴ Háa Yôesiví tã²nin diwe nata²muu waa napo², kinnân natü²di:

Háa un Hudíyo ímuu²in úví²o²in namuudi ná²in
 Hudíyo dimuupí²in Yôesiví²gedi yanáki
 dívíhée²o².

In Hudíyoví k'ewé² taadibo há²to in ovây²aywoení

²⁵ Wí Hudíyo Yôesiví tsontüü i²a²gindodáho², in Hudíyoví k'ewé² taa imáa²indá ûnchá²muu; hewänbo ná²i tsontüü i²a²gindopídá, tobá nataamuu wänbo² iví taa wí²ûnchá²muupí. ²⁶ Hedi wí Hudíyo namuupí² Yôesiví tsontüü i²a²gindodi tobá in Hudíyoví k'ewé² taa imáapi wänbo², Yôesidi óechä² nataamuu waagibá. ²⁷ Wí to²wí iví túu²ú ûnk'ewé²taamuupídí

hewänbo i tsontuü i'a'gindodá un Hudíyo ímuu'in wovâykeekw'óe'ó híwó' wí'úví'opídí, gá i tsontuü wívîn'a'gindopídân, tobá ná'i tsontuü-á úntá'muu wänbo hedá tobá ík'ewe'taamuu wänbo'.

28-29 To'wí wänbo wí Hudíyo waa nawänpi'aypuyädibo ta'gendi Hudíyo wínamuupí. Hedí wí to'wí in ta'gennin k'ewe' taa wí'imaapi wên k'ewe' taadi iví túu'ú eedi óewänpitaa'andibo'. Hewänbo nakhây'ä' wí to'wí iví pí'ná khó'yé-áho kodí'di Hudíyo namúní'in hedânho ta'gendi hã'bi namúnídí, hedá in ta'gennin k'ewe' taa-á pí'ná khó'yébá imá've-í'indá ûnkây'ä'. Hedí kin waagi ûnpo' i tsontuü iwänpi'a'gindodida'βά yoe, hewänbo i Yä'dâa'i P'oewaahâadi óetaa'an waagibá nakhây'ä'. Wí to'wí hã'biví'gedi Yôesi-ân híwó' ihée'o', t'owada'βά yoe.

3

¹ Ma'di to'wí na'âanı, “Hää-an in Hudíyo dâymáa in wé'ge'in t'owa dâymáapí'”? Hedí háagí'innan nachã'muu hã'in Hudíyoví k'ewe' taa?” ² Gá báyéki'innân. Páadé iweho Yôesidi in Hudíyo iví tsontuü ovâymägi dâ'yâyngi'amídí. ³ Hedí tobá wáy wên in háa dínkhây'ä' waagi wídíví'opí wänbo', ti Yôesi wá' ûn'óde-í i'amídí háa itü'an waagi? ⁴ Yoe, há'to ûn'óde-í. Gínkhây'ä' gitúní'in Yôesi-á wí'ihôeyó'opí'in tobá t'ähki t'owa dihôeyó wänbo'. Yôesiví tã'nin diwe iví'gedi ûntü' waa: Ihée'andá t'owa dínhanginnání ta'ge ihí'máa'in.

Hedí t'owadi ônt'e'p'idénde wänbo dínhanginpúwí hãnhay wänbo híwó'pí wí'i'opí'in.

⁵ Hewänbo ma²di wí to²wí t'owada² namuudibo kin na²ánde²: “Naa dáyhíwó²pi²andá, Yôesi-á shánki híwó²dá i²o²in nakeepo²; hedânkun híwó²wínamuupí Yôesidi dítuchänú-í²in.” ⁶ Hewänbo wí²gínkhây²âhpi² kin waagi ívíhée²amí²in. Yôesi wí²bo híwó² i²opídá, hândidan i-á ûnkoedí-í ta²ge natúní²in in t'owa dívít'aywó²nannin?
⁷⁻⁸ Heđi ma²di to²wí kinnân natúní: “Naa dáyhôeyó²andáho², iwedi nakeepo² Yôesi-á shánki hay²i namuu²in, gá i-á wínahôeyópíđân. Heđiho kin napo²di Yôesi wí²ûnk'óepí dítu²âamídí t'aywó²to²i omuu²in.” Hewänbo to²wí kin ihée²andiví hí²ûntu²da² gínkhây²â² ívít'aywó²nâamí²in, hedânho na²inbí t'aywó²di iwedi hääwí híwó²di napúwí. Wên t'owa yanáki naví²gedi dívíhôeyóhí²máadi dítú² kin waagi naa oháhkanyi²in. Hâ²min t'owa-áho i tuchänu dín²â²i² dâyhóní-áhe².

T'âhkídíbo dívít'aywó²nan

⁹ Nää otsikapúwí, ti na²in Hudíyo shánki híwó²nin gimuu in wé²ge²in t'owaví²wedi? Heđân yoe. Naadi ho wâykeekw'ódi t'âhkídíbo t'aywó²to²inda² gimuu²in, na²in Hudíyo-á hedá in Hudíyo dimuupí²indá. ¹⁰ Yôesiví ta²nin diwe kinnân ûnta²muu:

To²wí wänbo iví wówátsi ta²ge wí²ihonpi, wí²wänbo yoe.

¹¹ To²wí wänbo wínaka²póya²pi² háa in yä²dâa²in namuu²in,
to²wí wänbo wínada²pi² Yôesi óetaa-í²in.

¹² T'âhkídíbo Yôesiví²wedi dívíhänge²an,
inbí wówátsi-á hääbo wídínchä²muupi,
wí²wänbo wína²ânpí híwó² i²o²i².

- 13 Wí penípho óehuudi nasuü waagibá inbí hí?-á
 tay'i dínmuu,
 hôeyóda' inbí hän diwe dínkw'ó,
 háa ditû' waa whänpûuvi só'p'oe waagi'ba
 dínmuu,
 14 hedi inbí sóphogedi t'aywó'di hí?-á hedá hí?
 nawhahkant'óe'i-á báyékiho dínpi'.
- 15 Häädi wänbo t'ähki dikhâymuu
 dâyt'owat'ahanú-ídi,
 16 wähää dimää wänbo hääwí dâypedee'o',
 hedá t'owa-á ovâydaháachando'.
- 17 Háa inbí wówátsi tsaaginpidíbo dâyhûuwí'in
 wídínkoedihanginnáhpí,
 18 hedi Yôesi-á hây wänbo-á wídây'a'ginpí.

*Yôesidi in t'owa ovâychaamáa t'aywó'di
 wídây máapí waa inbí whäyü dínmuudibo', háa
 díví'o'in namuudá yoe*

- 19 Gínhanginná t'ähki Yôesiví tsontuü
 natû'di-á in to'wên dâya'ginnamídi
 dívísó'dêe'ingí'in namuu'in, hedânho wídítúnípidí
 wídívít'aywó'nanpí'in, hediho t'ähki t'owa
 dínhanginnání Yôesiví'piye' dívít'aywó'nannin.
 20 Yôesi há'to natúní wí to'wí t'aywó'di imáapí'
 waagi namuu iví tsontuü ôn'a'ginnamídi
 iwänpisó'díndedibo', gá nã'i tsontuudá in
 t'owa ovâykeekw'óe'ódân dívít'aywó'do'in.
 21-22 Hediho nää-áho nã'in nathaypóe háa t'ähki
 Yôesiví ta'nin diwe ûntû' waa: Yôesidi in t'owa
 ovâychaamáa t'aywó'di wídây máapí waagibá
 inbí whäyü Jesus Christ-ví'piye' dínmuudi, i
 tsontuü dâya'ginnamídi dívísó'díndedida'ba
 yoe. Nã'i tuü-á t'ähki t'owagi' namuu, t'ähki

t'owa ha'minda' gimuudi, ²³ gá t'ähkídibo ívít'aywó'nandân, hedího to'wí wänbo yä'dâa'ida' wínamuupí Yôesi t'ähkí yä'dâa'i namuu waagibá. ²⁴ Gínt'anmuupí wänbo Christ Jesus íví ûnp'oedi iwá'âa na'inbí t'aywó'di iwedi díma'p'ädi-ídi, hedí ná'i namuudiho Yôesi Tádádí íví séegísehkanä ûnmuudi díchaãmáa t'aywó'di wí'âymaapí waagibá. ²⁵⁻²⁶ Hännwänbo Yôesi Tádá í'ánshaamägi Jesus óesaanídí, íví ûnp'oe ich'äänídí, hedânho íví'piye' ívíwhäyundedáho na'inbí t'aywó'di dínýaa'amí. Hännhay waabo t'owa dívít'aywó'nan wänbo Yôesi Tádá nabo'atädí itsíkha'andi wesebo wí'ovâyutuchänupí dín'ä waagi. I-á wí'bo t'aywó'di wí'imáapí kin í'an wänbo', gá Jesus-dáho in t'owaví t'aywó'di ovâyýâakankhâymaadân. Hedího náa-á híwó'da' í'o'in na'in dínkeeyo', to'wên Jesus-ví'piye' dívíwhäyunde'in ovâychaãmáadi t'aywó'di wíðâymaapí waagibá.

²⁷ Hedího Yôesi Tádádí ha'wâa na'ingí' í'andi, ti gínk'óe ívíyêngihée'amídí? Hedân yoe. Háadí? Gá Yôesi Tádádí díchaãmáadân t'aywó'di wí'âymaapí waagi hääwí híwó'di íví'andi namuudá yoe, hewänbo Jesus-ví'piye' ívíwänpiwhäyundedân. ²⁸ Hedânho gínhanginná Yôesi Tádádí t'owa ovâychaãmáa t'aywó'di wíðâymaapí waagi inbí whäyü dínmuudíbo', i tsontuü dáy'a'ginnamídí dívíkhäädededida' bá yoe.

²⁹ Hedí ti gi'âanı Yôesi-á in Hudíyoví'da' namuu'in, in Hudíyo dimuupí'inbí-á yoe? Hedân yoe. Yôesi-á in Hudíyo dimuupí'inbí' wá' namuu, ³⁰ gá wí'da' wí Yôesi na'ändân, hedí idáho ovâychaãmáa in Hudíyo dimuu'in Jesus-

ví'piye' dívíwhäyunde'in t'aywó'di wídâymáapí waagibá, hedá in Hudíyo dimuupí'in wá' hanbá. 31 Hedânho na'inbí whäyü gínmuudibo ti ná'i tsontuu-á äyyoegi'o'? Hedân yoe. Nää-á shánkí gínkoedi äy'a'ginnamídí háa natû' waa.

4

Abraham-bí whäyü háawin ûnmuu'in

1 Nää wäyhí'khâymáa Abraham-bí'gedi háa ûnpóe'in, i-á na'in Hudíyo gimuu'inbí páadé'i thehtáy pahpâa gínmuu. 2 Yôesi natúdáho idá Abraham-dá óechaamáa'in t'aywó'di imáapí waagi híwó' i'odibo', hedânho Abraham ûnkoedí-íwän iví híwó'di tsiyekan ni'gedi iyêngihée'amídí. Hewänbo Yôesi wínatúhpí Abraham-dá ûnkoedi iyêngihée'amí'in. 3 Yôesiví tạ'nin diwe kinnân nata'muupí'an:

Abraham Yôesiví'piye' iwhäyüðânkun Yôesidi óechaamáa t'aywó'di wí'imáapí waagi.

4 Kin waagi namuupí'an: To'wí it'ôe'andi-á óewá'ánde', hedi iví wá'âa ûnt'anmuu häyü it'ôe'an waagidi, wí'óewänpidamähpí. 5 Hewänbo to'wí wänbo híwó'di hääwí i'andi nawänpimuudibo há'to ûnkoedí-í natúnídí t'aywó'di wí'imáapí waagi'bá namuu. Yôesida'mân ûnk'óe wí to'wí óechaamá've-ídí t'aywó'di wí'imáapí waagi, ná'i to'wí t'aywó'to'i namuu wänbo', hedi kin óechaamáa iví whäyü ûnmuudibo', híwó' i'amídí iwänpikhäädeditá yoe. 6 Hedânkun David hân'oe natú in to'wên Yôesidi ovâychaamáa'in t'aywó'di wídâymáapí waagi dihíhçaa-i, hewänbo híwó'

díví'amídí dívíkhäädē'in namuudá yoe. ⁷ Kinnân itä'nan:

In to'wên inbí yä'dâapí tsiyekan
ovây'owóyé'indádí
in to'wên inbí t'aywó'di ovâyâyâ'annindádí
dihíhchaa.

⁸ I to'wí Yôesidi wíyá wí'óetu'opí t'aywó'kandi gin nahíhchaa.

⁹ Hedí to'gí'-an ná'i híhchan namúní? Ti in Hudíyogí'da'? Yoe, in Hudíyo dimuupí'ingí' wá' namuupí'an. Gínhanginnáhpí'an Yôesi natú'in idi Abraham óechaámáa t'aywó'di wí'imáapí waagi iví whäyü ûnmuudi. ¹⁰ Hewänbo ti Abraham in Hudíyo-ví k'ewe' taadi ho nataamuu ihaydân kin Yôesi iví'gedi natú? Yoe, wa'di óetaa'anpídibo-ân. ¹¹ Tí'úugédân Yôesi natú Abraham in taa ikéyí'in nathaypúwídí Yôesidi ho óechaámáa'in t'aywó'di wí'imáapí waagi. Hewänbo kin Yôesi ho i'an Abraham-bí whäyü ûnmuudibo wa' in taa imáapídibo'. Hedânkun Abraham-dá t'ähki in to'wên ta'gendi Yôesiví'piye' dívíwhäyunde'inbí tádá waagi'ba dínmúní, tobá ná'in Hudíyoví k'ewe' taa dâymáapí wänbo', hedí in wá' Yôesidi ovâychaámáa t'aywó'di wídâymáapí waagi. ¹² Hedá in to'wên kin ditaamuu'indá wá' Abraham-dá inbí tádá waagi'ba dínmuu, hewänbo in t'ähkiví'-á yoe. Abraham-bí ây waagi'in ta'gendi dimúnídí, indá dántáy iví ahtaa eeye díví'ahtuyé-ídí, i waagibá whäyü dâymá've-ídí, in taada'ba yoe, gá ná'i whäyü-áho Abraham imáadân wa' in taa iké'pídibo'.

13 Yôesidi iví tuu Abraham óemägi idi Abraham-dádí iví ây iwedi'indádí ovâymäáni'in hääwí t'ähkí nää oepáa k'aydiwi', hewänbo kin natú gá Abraham óechaamáadân t'aywó'di wí'imáapí waagi iví whäyü ûnmuudi, i tsontuu i'a'ginnamídí ikhäädededá yoe. 14 Yôesidi i hääwí ipäkhâymaa'i' in to'wên i tsontuu dâya'a'ginnamídí dívísó'dinde'in ovâymäánidáho', in whäyü iví'piye' wínatâynípí, hedi i tuu Yôesi imägi'i-á hääbo wí'ûnmúnípí. 15 Hewänbo wí to'wí i tsontuu i'a'ginhánúdá Yôesidi óetuchänunde'. Tsontuu wänbo nayipídá há'to nakoedi-í wí to'wí i'a'ginhánú-ídi, hewänbo nayi-ákun ná'i tsontuu.

16 Hedânkun hääwí híwó'di iví'anpídíbo Yôesi iví tuu imägi t'ähkí in Abraham-bí ây iwedi'in dimuu'in dínkoedi iví séegísehkanä dâykéyi'in inbí whäyü dínmuudi. Hedi kin Yôesidi ovây'âamí in to'wên i tsontuu dâymáa'inda'ba yoe, hewänbo t'ähkí in to'wên dívíwhäyunde'in Abraham iwhäyü waagibá. Abraham-dá tádá waagi'ba gínmuu t'ähkí na'in ta'gendi Yôesiví'piye' ívíwhäyunde'ingí'. 17 Yôesiví ta'nin diwe ûnkw'ó háa Yôesi natú waagi:

Abraham, wí tádá waagi wísóge báyéki t'owagi' wéngé dithaa wänbo'.

Abraham-dá Yôesivípiye' iwhäyunde', hediho Yôesidi i-á ho óechaä hä'in t'owaví tádá dínmuu waagi. Yôesi-á ûnkoedi chu'in wänbo ovâywówapaa-ídi, hedá tobáháa hääwí wa' wínapóepí wänbo', napúwí gin Yôesi natúdáho', napúwí-ákun.

Háa Abraham Yôesiví'piye' iwhäyü waa na'in wá' gínkhây'ä' ívíwhäyü-í'in

18 Hedihō tobá whäyupíwó? waa namuu wänbo? Abraham-dá iwähäyü báyékí t'owa wéngé t'ähkí dithaa'inbí tádá dínpuwagít'óe'in, gá Yôesidi óetu'andân báyékí tí'úugé ká'ää'in ûnkwó'gít'óe'in, hedi han ûnpóe. 19 Iví túu'ú í'gedi í'ánshaamáadí, há'to í'âykw'ôení waa nachaa, ma'di tãgintã (100) paayo'i ho namuudi, hedá iví kwiyo Sarah-á wãhphade kwiyo nã ûnmuudiho, há'to nasãhpúwí í'gedi wá' í'ánshaa'an. Hewänbo tobá kin namuu wänbo iví whäyü wa'di ûnkay. 20 Yôesiví tuu óemãgi'in ônwhäyü, hedi iví whäyü ûnhãániví'wedi shãnkí ûnkaypóe, hediho Yôesi-áho kw'áayébo? óemáa. 21 Iví pí'nã khó'yého? ûnhanginná Yôesi ûnkoedi'in hããwí t'ähkí natú'i? í'amídí. 22 Hedãnkun Yôesi natú idi Abraham óechaãmáa t'aywó'di wí'imáapí waagi iví whäyü ûnmuudi. 23 Hewänbo ná'i hí? Abraham-bí'gedi Yôesi natú'i? Abraham-gí'da? wínatã'muupí, 24 hewänbo na'ingí-ân wá? natã'muu, gá Yôesi-á natúdân na'in wá? díchaa t'aywó'di wí'ây máapí waagi iví'piye? ívíwhäyundedi, idá Jesus na'inbí tsondi shãnkí hay'i gínmuu'i? óewáywówápaa. 25 Yôesi Tãdádí Jesus óemãgi na'inbí t'aywó'di gínmuudi nachúu-ídí, hedá óewáywówápaa nakeepúwídí díchããmáa'in t'aywó'di wí'ây máapí waagi. Jesus-ví'piye? ívíwhäyundedáho Yôesi Tãdádí díchããmáa t'aywó'di wí'ây máapí waagi.

5

1 Hedihō nã Na'inbí Sedó Jesus Christ-di na'indádí Yôesi Tãdá-ádí díwón, gá Yôesi Tãdádá díchããmáadân t'aywó'di wí'ây máapí waagi

na'inbí whäyu gínmuudi. ² Hedi na'inbí whäyu gínmuudi**á** Jesus-di Yôesi Tádádí'piye' dikan, iví séegísehkanä âytáa-ídí, hedi háädi wänbo t'ähkí ná'i séegísehkanä-á âymá've-í. Hedi hânho ívíhíhchando', gá gínhanginnândân wáy wí thaa-á Yôesiví sa'wó'di kohthay iwe i-ádí gikwo'gít'óe'in. ³ Hewänbo hähaydi'dä' bá wíghíhchanpí. Gíhíhchan wá' âyt'ôephadende wänbo', gá tobáháa gínpóe wänbo ná'i t'ôephade namuu'idi gíháhpo'dân ívíyää'amídí. ⁴ Hedá ívíyää'andá shánkí gikweesenpa', hedi gikweesenpaa iwedáho shánkí gínhanginná ho napúwí'in háa Yôesi natú waa dípägít'óe'in. ⁵ Hedi kin ívíwhäyundedá há'to gichanpúwí híwó'pí'piye' ívíwhäyunde'in, gá i Yä'dâa'i P'oewäähäa Yôesidi dímägi'i na'inbí pí'ná khó'yé âymáadân, hedi idá dínthayyo Yôesi Tádádí hânho na'in díséegí'in. ⁶ Wa'di wí'bo ívípikhäge'namídí yä'dâa'in gimúnídi gínkoedipídíbo', híwó' naná' dihaydân Christ nachuu na'in gimuudi, in Yôesi ây'a'ginpí'in gimuu wänbo'. ⁷ Nabâapu'wan óeshaa-ídí wí to'wí nahíye-í'i wíyá to'wígí' nachúu-ídí, tobáháa i wíyá to'wí i tsontuü i'a'gindo wänbo'. Ma'dân wí to'wí nahíye-í wíyá to'wí iví wówátsi ta'ge ihondi namuu'igí' nachúu-ídí. ⁸ Hewänbo wa'di na'inbí wówátsi thaa t'aywó'diwe gikw'ó' dihaydibo Christ na'ingí' nachuu. Kindidân Yôesi Tádádí dínkeeyan na'in hânho díséegí'in.

⁹ Hedânkun ta'gendi gínhanginná Jesus-di dín'aywoeni'in Yôesi Tádádí wídítuchänú-ípídí, gá na'ingí' ho nachuudi iví ûnp'oe ich'áaadân, hedânho Yôesi Tádádí dícháamá've-ídí t'aywó'di

wí'ây máapí waagi. ¹⁰ Yôesi Tádáví hânmin gimú'dewän, hewänbo nää-á i-ádí ívíwón iví ay na'ingí' nachuudi. Hedího nää Yôesi Tádá-ádí ívíwóndí gínhanginná ta'gendi dín'aywoení'in gá iví ay wíyá ûnwówápóedân. ¹¹ Hewänbo hähayda' bá wínamuupí, nää-á gihíhchan wá' gá Jesus Christ, i shánkí natsonyi'i namuu'i hedá i Yôesi Tádá-ádí díwóndi-á, idího dínkeyan háawi Yôesi Tádá namuu'in.

Háa Adam i'annin namuudi in chuwa na'in dínkán, hewänbo háa Christ i'annin namuudá wówátsi âymáa

¹² Wí wí' to'wí Adam gin nakháwä'i' it'aywó'nan, hedí i-á it'aywó'nandi t'ähkí t'owa t'aywó'di giyámu. Adam-dá it'aywó'nandi nachuu, hedí na'in wá' ívít'aywó'nandibo t'ähkídíbo git'aháani. ¹³ Wí tsontuü wänbo nayipídáho Yôesi há'to natúní t'owa wídâytsontuü'a'ginmáapí'in hedího wínatúnípi dívít'aywó'nannin. Hewänbo nää oepáa k'aydi in t'owa-á dívít'aywó'doho wa'di Moses i tsontuü itá'nanpídíbo'. ¹⁴ Nää'in gínhanginná gá Adam-bí thaa iwedi Moses-ví thaa iwéhay chuwa-á t'ähkí t'owa dínpówádân, tobá inbí t'aywó'di dínmuu'i Adam-bí t'aywó'di waagi wídínmuupí wänbo'. ¹⁵ Háa Adam ûnpóe'indi díhá'o Jesus-ví'gedi, i-á Adam-bí wówátsi thaa ihaydi wa' nää oepáa k'aydi wínapówápí. Hewänbo háa Adam i'annindá hedá háa Jesus i'annindá handa' wídänmuupí. Hääwí Yôesidi khâagipí dímä'i-á Adam-bí t'aywó'diví shánkí nakay. Wí' wí sen Adam namuu'i Yôesiví p'óegédí ihânge'andibo t'ähkí t'owa dit'ahán.

Hewänbo Yôesiví séegísehkanä-á hedá hääwí dímä'i-á shánkí gáhäyú'i ûnmuu Adam-bí t'aywó'di ûnmuu'iví'wedi, hedi t'ähkí t'owa dínkoedi ná'i Yôesi imä'i dâyhónídí, wí' wí sen Jesus Christ namuu'iví séegísehkanä ûnmuudi. ¹⁶ Hedi háa napóe'in i Yôesi Tádádí dímä' iwedi hedá háa napóe'in Adam-bí t'aywó'di iwedá handá' widänmuupí. Ná'in wéhpêe t'aywó'nin Adam i'annin namuudá Yôesi Tádá natú tuchänu-á na'ää-í, hewänbo tobá báyéki wây-á t'owa báyéki t'aywó' díví'o wänbo', Yôesidi wí híwó'di hääwí wá'âapídíbo na'in dímä' waagibá idi díchäãmáa t'aywó'di wí'âyamáapí waagi. ¹⁷ Hedänkun wí wí' sen it'aywó'nandibo chuwađi na'in t'ähkí díhógi. Hewänbo háa ná'i wíyá wí sen Jesus Christ namuu'i' i'annindá shánkí hay'in namuu. Idá hânho báyéki séegísehkanä-á dímä', hedi kinnân dítumáa: Tobá gint'anmuupí wänbo', i-á natú' idi díchäãmáa t'aywó'di wí'âyamáapí waagi, hedi wówátsi nahándepe'i'in âymá've-í, hedá iwe tsonnin waagi'inbá githáa-í.

¹⁸ Hediho ha'wâagi napóe. Wéhpêe t'aywó'nin Adam i'annin namuudiho tuchänu napówá t'ähkí t'owagi', hedá han waagibá wí wí' ta'gedá' hääwí Jesus i'annin namuudi nakoedi t'ähkí t'owa ovâytu'ãmídi t'aywó'di dâymáapí'in waagi'in dimuu, hedá wówátsi nahándepe'i'indá ovâymääní. ¹⁹ Wí wí' to'wí Adam namuu'i háa Yôesi Tádádí óetu'an waa wí'i'a'ginpídiho t'ähkí t'owa dit'aywó'to'inpaa. Hanbá i wíyá wí' to'wí Jesus namuu'i' i'a'ginnandibo t'ähkí t'owa dínkoed dipúwí'in in Yôesidi ovâychäãmáa'in

t'aywó'di wídâymáapí waagi. 20 Yôesi iví tsontuu imági t'owa ovâythayyamídí hâyú hânho dívít'aywó'nannin. Hewänbo i t'aywó'di gínkeepóe ihaydá Yôesiví séegísehkanä-á shánkí wänbo-á ûnkeepóe. 21 Hediho i t'aywó'di kay'i namuudibo t'owa ovây'tandânho chuwahe dínk'óe, hewänbo Yôesi Tádáví séegísehkanä-á t'aywó'diví shánkí ûnkay, hediho na'in díçhaamáa t'aywó'di wí'ây máapí waagi hedânho wówátsi nahándeip'in âykéyídí, háa Jesus Christ na'inbí tsondi hay'i gínmuu'i na'ingî' i'annin namuudi.

6

Háa Christ i'annin namuudiho ta'gendi giwówáyêeni

1 Báyéki t'aywó'di dîn'owóyéendediho Yôesiví séegísehkanä shánkí ûnkeepo'. Hediho hân gínkhây'ä' iví'amí'in? Ti in ta'gen gínk'óe ivít'aywó'kanhûuwídí wíyá shánkí iví séegísehkanä ûnkeepúwídíbo? 2 Hedân yoe. T'owa chu'in dimuu'indá wídívít'aywó'dopí, hediho t'owa chu'in waagi'inbá gínkhây'ä' gimúní'in hedânho t'aywó'di eeye wí'ívíhûuwípídí. 3 Na'in díp'ó'p'oe'an âykeeyamídí Christ Jesus-ádí wí'da' gimuu'in. Ti wí'úhanginnáhpí'an díp'ó'p'oe'an dihaydi i-ádí gichuu waagibá âykeeyan. 4 Hedânkun díp'ó'p'oe'an dihaydi, i-ádí gichuudáhá' díkhä'kw'ódi waagibá napoé, hedânho Yôesi Tádáví pínnán kaydi Christ nawáywówápóe waagibá, na'indá wá' wówátsi ts'aamin âymá've-í.

5 I-ádí gichuu waagibá gipóe, hediho kindidi i-ádí wí'da' waagibá gipóe. Hedânkun i

nawáywówápóe waagibá na'in wá' díwáywówápa-
 í. ⁶ Gínhanginná ná'in: T'aywó'to'in t'owa
 gimuuwän, hewänbo Jesus-ádí phé'wan deedi
 gichuu waagibá gínpóe hedânho háa gimú'de
 waagi'in wíyá wí gimúnípídí, hedá iwedá i
 t'aywó'di iwedi díma'p'ăđi-í, ⁷ gá to'wên
 dichuu'indá t'aywó' diwedi dima'pândân.
⁸ Ná'in ívíwhâyunde?: Christ-ádí gichuudá i-
 ádíbá giwówayêení, ⁹ hedi gínhanginná Christ
 nawáywówápóedí hânhay wänbo wíyá wínachúu-
 ípí. Chuwadi há'to wíyá óet'aaní. ¹⁰ Christ
 nachuudiho t'aywó'didi há'to wíyá óekéyí, hedi
 náa wíyá nawáywówápóedá hânhay wänbo t'ăhki
 nawówayêení i Tádá óehihchanmăänídí. ¹¹ Hedi
 un wá' chu'in ímuu waagi kin únkhây'ă' í'âanı'in
 hedânho wí'úvít'aywó'kanhúuwípídí. Náa-ă Jesus
 Christ-ádí ímuudi unbí wówátsi bîn'amí Yôesi Tádá
 bînhihchannamídí.

¹² Hedânkun wí'úvímăänípí i t'aywó'didi
 wovây't'aanídí, hedi unbí túu'ú iwe háa íwânpichaa
 waagi wí'úvíkanhúuwípí, ná'i túu'ú-á wáy wí
 thaa únkhangít'óe. ¹³ Wáy wí wänbo' unbí
 túu'údí t'aywó'kan wänbo yă'dâapíkan wänbo
 wíwînkamăänípí. Shánkídí kinnân úví'amí:
 Unbí wówátsi-á Yôesi Tádá bînmăäní gá idân
 chuwa iwedi wovâywhahógidi wówátsi ts'amin
 wovâymagidân, hedá unbí túu'ú t'ăhkidá
 híwó'dida' Yôesi Tádágí' bîn'amí. ¹⁴ Náa iwedi
 t'aywó'didi wíyá wíwovây't'ankhây máapí gá
 wí'úvîwânpisó'dindepidân híwó'nin ípúwídí i
 tsontuu bîn'a'gindodibo', hewänbo Yôesiví
 séégísehkanăđân wovâykhăge'do híwó'?

úvíkanhûuwídí.

Gínkhây'ä' híwó'di ívíkanhûuwí'in

15 Hedího kin napo'di hânnan nää íví'amí? Ti gínk'óe i tsontuü ây'a'ginhánú-ídí hedi kin ívít'aywó'nâamí? Hedân yoe.

16 Únpihanginnáhpí'an wí to'wíví'piye' úvímägidá igí'dá' úvít'óe'amídí hedá idá' bîn'a'ginnamídá, hedân nã'i to'wíví pant'óe'in waagi'inbá ímuu. Hedího hanbá úvívänpit'aywó'kanhondá kindidi t'aywó'diví panho ímuu, hedá íchú-í. Hewänbo Yôesiví'piye' úvímägidá bîn'a'ginnamídí, iví pant'óe'in waagi'in ímuu,

hedi idá wovâychaamáa t'aywó'di wívîn máapí waagi. 17 Naadi Yôesi dókú'daa'o', gá tobá úvít'aywó'dodi nã'i t'aywó'diví pant'óe'in waagi'in ímú'de wänbo', nää-á pín ta'ge haydi in ta'gen háhkan wovâymägi'in bîn'a'gindodân.

18 Nää-áho t'aywó'di iwedi íma'p'ä, hedi unbí wówátsi thaa úvímägi híwó'didá' úví'äamídí.

19 Yä'dâakan ni'gedá t'ôedi íka'póya', hedânho nã'in pant'óe'inbí'gedi naadi wâyhi'máa wâythayyamídí shánkí íka'pówá-ídí. Wáymûu-áho úvít'aywó'dodi wên pant'óe'in waagi'inbá ímuuwän, hediho unbí túu'ú t'ähkídí úvít'aywó'dowän, hedá häädí wänbo t'ähkí híwó'pí' úví'owän. Hewänbo nää-á Yôesiví'piye' úvípimääní iví pant'óe'in waagi'in ímúnídí, unbí wówátsi ta'ge bîn'hûuwídí, hedânho yä'dâa'indá' ímúnídí háa Yôesi nada' waagi.

20 T'aywó'diví pant'óe'in ímuu ihaydi wí'ída'píwän unbí wówátsi ta'ge bîn'hûuwídí. 21 I t'aywó'di hääwí úví'andidi nää wovâywóeda'mä', hedi hândidan nã'i t'aywó'didi wovâykhäge'nan?

Wéngédí wänbo yoe. I t'aywó'di úví'o'i namuudi chuwa iwe ípowagít'óewän. ²² Hewänbo t'aywó'di iwedi íma?p'ändi nää-á Yôesiví pant'ôe'in waagi'in ímuu, hedi idi wovâykhäge'do' yä'dâa'in ípúwídí. Hedi Yôesiví'piye' úvímägidihó wówátsi nahánde'pí'in bînkéyí. ²³ T'aywó'digî' ívít'ôe'andá chuwa-ân na'inbí wá'âa-á gínmúní. Hewänbo Jesus Christ na'inbí tsondi hay'i-ví'in gimuudá, in wówátsi nahánde'pí'in Yôesi Tádádí dímä'.

7

Paul khóhtsaq i'gedi ita'do' hedânho wiyá hääwi giháhpúwídí

¹ Tí'úuwín páadé'in, tsontuú i'gedi úhanginná'nin ímuu, hediho wâyhí'khâymaa kinnân: Úhanginnáhpí'an únkhây'ä' ná'i tsontuú bîn'a'ginnami'in háyú wówátsi úntä'an diwe pu'wahaydá'. ² Gá kinnân: Wí kwee nakhóhtsaq'ändi-á únkhây'ä' iví sedó-ádída' natháa-í'in háyú wówátsi thaa iví sedó úntä'an diwehay. Hewänbo iví sedó únchuu ihaydáho iví sedó-ádí wiyá wínawhi'änpí. Hannânho natû' in khóhtsaq tsontuú. ³ Hedi wiyá pi'wí sendádí ithayedá wa'di iví sedó únwówayidibo', iví sedóví'piye' it'aywó'do'. Hewänbo iví sedó únchuudáho in khóhtsaq tsontuú iwedi nawhima'p'ä, hediho wiyá pi'wí sendádí ikhó'yä'dáho t'aywó'to'i wínamúní.

⁴ Un wá' kin waagibá únpo', naví tí'úuwín páadé'in. Christ-ví túu'ú únchuu ihaydá un wá' íchuu waagibá únpoé hedi kindidi ná'i tsontuú

Moses itaʔnan diwedi wovâywiye. * Hediho nää-á únkoedi wíyá toʔwíwíʔ ímúníʔin, i toʔwí nawáywówápóeʔi-ân i namuu. Hediho nää-á ivíʔ gimuuđi gínkoedi híwóʔdi háäwí Yôesi Tádágíʔ ívîʔâamíʔin. ⁵ Háa giwânpidaʔ waagi ívítʔaywóʔdođi naʔinbí wówátsi âyhonwânhoʔ, hedi ihaydá wíyá shánkí ívítʔaywóʔnamíʔin gidaʔpoʔ náʔi tsontuų gitʔoʔdi, hedi chuwa iwe gipóyaʔwân náʔi tʔaywóʔdidi naʔinbí túuʔú dîntsonmáadíboʔ. ⁶ Hewânbo nää-á i tsontuų iwedi gimaʔpʔă. Nää-á Christ-ádí gichuu waagibá gínpoʔdi i tsontuųdi wídítsonmáapí. Nää-á wíyá tsʔaabi gihâhpóe Yôesi âyʔaʔginmäänídí i Yäʔdâaʔi Pʔoewaahâadi díháʔo waagi, háa ívîʔowân waagá yoe i tsontuų nataʔmuuʔiʔ âyʔaʔginnamídí ívísóʔdinde ihayđi.

Wáyyedí shánkí i tsontuų gínhanginnândi shánká ívítʔaywóʔdoʔ

⁷ Hedi ti gitúní náʔi tsontuų-á tʔaywóʔdi namuu gin? Hedân yoe. I tsontuųđidaʔmânho dînkeeyan háäwí taʔgendi tʔaywóʔdi namuuʔin. Gá kinnân: I tsontuų-á natûʔ,

Hääwí wíyá toʔwí ûnkʔwʔdiʔ wíʔídaʔípí.

Han natúnípidá háʔto naa dînhanginnáníwân wíyá toʔwíwí háäwí odadaʔdi dáyʔaywóʔdoʔin.

⁸ Hewânbo háʔin tsontuų iʔgedi ohâhpóe ihaydá shánkí dáyʔaywóʔnamíʔindá odaʔpóe, hediho wíyá i háäwí navíʔ namuupíʔ shánkí owânpidaʔ. Hewânbo i tsontuų nakʔóepidá háʔto

* **7:4** Náʔi híʔ wínatuʔdaʔpí wígínkhâyʔâhpí i tsontuų âyʔaʔginnamíʔin, hewânbo natuʔdaʔ-á, wígintáypí i âyʔaʔginnamíʔin hedânho Yôesidi díchâamáʔve-ídí tʔaywóʔdi wíʔâyamáapí waagi, gá Jesus-víʔpiyeʔ ívîwhâyundedá han díchâamáadân.

ta'gendi dînhanginnáníwän dáy't'aywó'nannin.
 9-10 Naa o'ân owówámuu'in wa' Yôesiví tsontuú
 oka'pówápí ihaydibo'. Hewänbo ná'in tsontuú
 natú'in wídínkhây'ähpí wiyá to'wíwí hääwí
 oda'i'in ta'gendi oka'pówá ihaydá, shánká
 dáy't'aywó'namí'indá oda', hedi ochuu waagibá
 dînhanginpóe. Hediho tobá na'in wówátsi âykéyídi
 Yôesidi iví tsontuú dímgági wänbo', naa-á in
 chuwaḍá' dínkán. ¹¹ I tsontuú i'gedi oháhpóe
 ihaydá, i t'aywó'didá in ta'gen ná'i tsontuú i'gedi
 namuu'in dínkaayan, hedi ná'i t'aywó'didibá díhay
 waagibá dînpóe.

¹² I tsontuú Moses ita'nandi-á Yôesiví'wedi
 na'ää, hedi t'ähkí i hí' iwe nata'muu'i yä'dâa'i-á
 ta'gendi-á híwó'di-á namuu. ¹³ Ti ná'i híwó'di
 tsontuúdi wí'bo in chuwa dínkán? Hedân yoe.
 Navi t'aywó'didân in chuwa dínkán. Hewänbo
 tobá ná'i tsontuú-á híwó'di namuu wänbo', naa
 dáy't'aywó'nandânho i tsontuú natú chuwa iwe
 díkáani'in. Hediho dînhanginpóe ta'gendi háawi
 i t'aywó'di namuu'in. I tsontuúdan dînthayyan
 t'aywó'di-á hânho yä'dâapî' namuu'in.

*Hääwídi na'inbí pí'nä khó'yé dîhänbo waagibá
 gínpo'*

¹⁴ Gínhanginná Yôesiví P'oewaahâadi ná'i
 tsontuú dímgágin. Hewänbo naa-á wí to'wí
 háa okanda' waagi dáywänpi'o'i omuu, gá
 t'aywó'diví pant'ôe'i waagibá omuudân. ¹⁵ Naa
 wídínhanginnáhpí háadí kin waagi dáy'o'in. Tobá
 híwó' okanda' wänbo', híwó' wídáy'opí, hewänbo i
 híwó'pí' dót'ay'i-á ihayḍá' dáy'o'. ¹⁶ Hedi híwó'pí'
 ta'gendi wó'kanda'pí wänbo dáy'odá, iwedi

nakeepo[?] naa ochanpo[?]in i tsontu[?]á híwó[?]di-
 ânkun namuu[?]in. ¹⁷ Hediho náá-á naa-á wí[?]bo i
 wó[?]muupí ha[?]wâagi dáy[?]o[?]i[?], hewänbo i t'aywó[?]di
 naví pí[?]ná dînk[?]w'ôndidân kin waagi díkando[?].
¹⁸ T'owa-ân omuudi háäbo híwó[?]di naví pí[?]ná
 kó[?]yé wídînk[?]w'ôhpí. Ná[?]i-á dînhanginná gá tobá
 híwó[?] okanda[?] wänbo wídînk[?]oedipídân. ¹⁹ Wiyá
 otúní: I híwó[?]di okanda[?]i-á wídáy[?]opí, hewänbo
 i híwó[?]pí[?]-áho dáy[?]o[?], oda[?]pí wänbo[?]. ²⁰ Hedi i
 okanda[?]pí[?]-á dáy[?]andáho[?], naa-á wí[?]bo i wó[?]muupí
 ha[?]wâagi dáy[?]o[?]i[?], hewänbo i t'aywó[?]di naví pí[?]ná
 dînk[?]w'ôndidân kin waagi díkando[?].

²¹ Hedânkun kin waagi háädi wänbo t'ähki
 dînpó[?] naa: Híwó[?] okanda[?] wänbo[?], shánkí
 wídînbâpu[?]wanpí dáy[?]t'aywó[?]namídí. ²² Naví
 pí[?]ná kó[?]yé-á ochanpo[?] Yôesiví tsontu[?]á
 híwó[?]dida[?] namuu[?]in. ²³ Hewänbo dînhanginná
 háädi wänbo t'ähki naví túu[?]ú t'ähki iwe wiyá
 pí[?]wí háäwí nayí[?], i-á naví híwó[?]di ánsaa-
 ádí ihänbo waagibá, hedi naví túu[?]ú iwedi
 owänpit'aywó[?]dikanda[?]di wí pant'ôe[?]i waagi
 opo[?]. ²⁴⁻²⁵ Hedi kindidiho naví pí[?]ná kó[?]yé-
 á ta[?]gendi Yôesigí[?]dá[?] ot'ôeda[?]. Hewänbo naa
 t'owada[?] omuudi dáy[?]t'aywó[?]do[?]. Áhkhi[?]yowän,
 to[?]dan díkhäge[?]namí naa, hedänho ná[?]i túu[?]údi
 chuwa iwe wídíkáanípídí? Naadi Yôesi Tádá
 dókú[?]daa[?]o[?] gá Jesus Christ i shánkí natsonyi[?]i
 namuu[?]idáho díkhäge[?]dodân.

8

*I Yä[?]dâa[?]i P'oewaqa[?]hâädi na[?]in díkhä[?]ge[?]máa
 na[?]inbí wówátsi yä[?]dâa[?]i âyhúuwídi*

1 Hedihō nää-á in toʷwên Christ Jesus-ádí dimuuʹindá Yôesi Tádádí wíʹovâytuchänú-ípi, 2 gá Christ Jesus-ádí wíʹdâʹ waagibá gimuudi i Yäʹdâaʹi Pʹoewaahâa i wówátsi napäyiʹiʹ ûnkoedidân dímaʹpʹädi-ídí tʹaywóʹdiwedi hedá chuwa iwedá. 3 Naʹindá tʹowadaʹ gimuudi wíʹgikaypi, hedihō Yôesiví tsontuü ihay wíʹâyʹaʹgindopí hedânho tʹaywóʹdiwedi dînʹaywoenídí. Hewänbo Yôesi Tádá-ânho ûnkoedi dînʹaywoenídí. Kin iʹamídí iví ay dînsan wí tʹowa napáa-ídí, naʹin kaypiʹin tʹaywóʹtoʹin tʹowa waagibá napóe, hedi tobá tʹaywóʹdi wíʹiʹanpi wänbo naʹinbí tʹaywóʹdi gínmuudi nachuu. Handidihō nãʹi tʹaywóʹdi-á óetʹan, hedânho tʹaywóʹdidi naʹin wíyá wídítʹaanípídí. 4 Hedí kin iʹan hedânho Yôesiví tsontuü natú waa naʹinbí wówátsi taʹge äyhûuwí. Hedí nää-á háa giwänpidaʹ waagidáʹ wíʹívikanhonpi, hewänbo háa i Yäʹdâaʹi Pʹoewaahâa natú ivíʹamí waagân.

5 In toʷwên háa diwänpidaʹ waagi dívíʹoʹindá häädi wänbo tʹähkí dívíʹánshaaʹo hääwí dikandaʹ iʹgedidaʹ, hewänbo in toʷwên háa i Yäʹdâaʹi Pʹoewaahâa nadaʹ waagi dívíʹoʹindá häädi wänbo tʹähkí dívíʹánshaaʹoʹ i hääwí i Yäʹdâaʹi Pʹoewaahâa nadaʹpóeʹiʹ. 6 Hedí háa giwänpidaʹ waagi ivíʹamíʹin niʹgedidaʹ ivíʹánshaamáadá chuwa iwe gipówá-í, hewänbo háa i Yäʹdâaʹi Pʹoewaahâadi dítuʹan waagi iʹgedi ivíʹánshaamáadá taʹgennin wówátsi-á hihchan ánshaa-á gínʹäá-í. 7 Hedânkun wí toʷwí háa nawänpidaʹ waagi iʹamíʹindáʹ iʹánshaaʹodi Yôesiví hänbiʹ waagiʹbá namuu, gá Yôesiví tsontuü wíʹiʹaʹgindopídân, hedi wíʹûnkoedipi

ôn'a'ginnamídí. ⁸ Hedi ki'min t'owadá há'to Yôesi óehíhchannamí.

⁹ Hewänbo Yôesiví P'oewaahâa ta'gendi unbí pí'nä khó'yé únthaadá háa i natû' waagi úvíkanhûuwí, háa íwänpida' waagida' bá yoe. Wí to'wí iví pí'nä khó'yé i Yä'dâa'i P'oewaahâa Christ-di ônsandi' imáapídá Christ-ví' wínamuupí.

¹⁰ Hewänbo tobá unbí t'aywó'di únmuudi unbí túu'ú únchúwí wänbo', Christ unbí pí'nä khó'yébo bînmáadá i Yä'dâa'i P'oewaahâadi wówátsi nahándepí'in wovâymä', gá Yôesi Tádádí wovâychaamáadân t'aywó'di wívínmáapí waagibá.

¹¹ Yôesi Tádádí Jesus óewáywówápa, hedi iví Yä'dâa'i P'oewaahâa unbí pí'nä khó'yé únthaadá, i Tádádí undá wíyá wovâywówápa-í, Christ Jesus óewáywówápa waagibá. Tobá unbí túu'ú únchuu wänbo', Yôesiví P'oewaahâa unbí pí'nä khó'yé únthaadi Yôesidi wówátsi wovâymääni.

¹² Hediho tí'úuwín páadé'in, nää-á hääwí giphaamuu waagibá hääwí híwó'di gínkhây'ä' íví'amí'in, háa giwänpida' waagida' bá yoe. ¹³ Háa íwänpida' waagida' unbí wówátsi bînhondá íchuu-í. Hewänbo i Yä'dâa'i P'oewaahâa úvímägidáho wovâykhäge'namídí i t'aywó'di unbí túu'údí úví'o'i bînyâa'amídí, kindidânho in ta'gennin wówátsi bînkéyi.

¹⁴ T'ähki in to'wên Yôesiví P'oewaahâadi ovâypahonnindá Yôesiví ây dimuu. ¹⁵ Yôesiví P'oewaahâa bînkê' ihaydá pant'ôe'in dikhuwôeda'in waagi'in wí'ímuupí, páadé'dí íchaa waagibá. Hewänbo i Yä'dâa'i P'oewaahâadi wovâyséegíhógi Yôesi Tádáví ây ímúnídí,

hedânho Yôesiví'piye' úvívúusu'o' ihaydá wí'ínbo bínkháyǎ'ní "Naví Tádá" gin. ¹⁶ I Yǎ'dâa'i P'oewaahâadânho na'inbí pí'nǎ khó'yé díhangin'ândo' Yôesi Tádáví ây gimuu gin. ¹⁷ Hedi iví âyho gimuudi i háäwí iví âygi' iwiyekw'ódi'i' âyhóní. Christ-ádí wé'ge ná'i háäwí âyhóní. Christ-ví'in gimuudibo âyt'ôephadende' i it'ôephade waagibá, hediho i-ádíba Yôesi Tádádí he'ennin dípaa-í.

Tobá nää t'ôephade iwe gikw'ôn wänbo', wáy wí thaa-á háä t'ähki híwó' gínpuwí

¹⁸ Ná'i sa'wó'di háäwí Yôesidi dínkhâymáa i'gedi dáy'ánshaamáadi, naa ochanpo' nää oepáa k'aydiwi t'ôephade-á háäbo wínamuupí waagibá. ¹⁹ Háä t'ähki nakhí'yendi-á nawó'onpo'di natsíkha Yôesi Tádá ikeekw'ôenídí na'in ta'gendi iví ây gimuu'in. ²⁰⁻²¹ Yôesi Taa i'ánshaamägi háäwí t'ähki nakhí'yendi' nachä'muupí waagibá napúwí'in. Ná'i háäwí wí'bo kin waagi wínapuwagít'óepí, hebo Yôesi-ân natú kin napúwí'in. Hewänbo wá' natú ná'i háäwí nakhí'yendibá wíyá híwó'di napúwí hedânho wínakhanmú-ípídi. Kindidi owáy Yôesi Tádáví ây chuwa iwedi dima'p'ändi háä t'ähki sa'wó' ingí' dínpóedí, ná'i háäwí nakhí'yendi-á wá' hanbá napúwí.

²² Ná'i gínhanginná, wí kwee na'eyehaydi únhaytú' waagibá, ná'i háäwí t'ähki nakhí'yendi-á wá' han waagibá napo', wa'di wíyá ts'aabi wínakhí'yenpídi. ²³ Hedi kin waagi wí'únpo'pí ná'i háäwí nakhí'yendida'. Na'in wänbo gínhaytú' waagibá gínpo', giwó'onpo'di gitsíkhakw'óni Yôesi Tádá ikeeyamídi na'in iví ây gipúwídi

díséegíhógi'in, hedá na'inbí túu'ú ts'aabi dînpáa-ídi wá' gitsíkhakw'ó. Hedí dínkeeyamídi han dínkhâymáa'in, idi i Yä'dâa'i P'oewaahâa na'in dímăgi. ²⁴ Yôesidi dîn'aywon dihaydi waabo nă'i napúwídi ívitsíkhahon. Wí to'wí wí hăäwí itsíkha'máa'i ho ikê'dáho?, hedáho wa'di winatsíkhapí. Háadan wí to'wí wíyá itsíkha'amí wí hăäwí ho ikê'di? ²⁵ Hewänbo hăäwí âykê'pî' wa'di âytsíkha'máadáho?, nakhây'ä' gibo'atä-í'in tobá wó'ondi âytsíkha'máa wänbo'.

I Yä'dâa'i P'oewaahâadi díkhäge'máa

²⁶ Hedá wá' kay gíntáydi i Yä'dâa'i P'oewaahâada díkhäge'do'. Kayp'in gimuudi wáyyédi wígyûusuhápi, hedí i hí' wí'âyshaadepídi gínwänpihaytû'. Hewänbo kin gínpo'di, na'inbí haytuu iwedibo' i Yä'dâa'i P'oewaahâada na'ingí' Yôesi Tádá óhéé'o'. ²⁷ Yôesi Tádá-á ûnhanginná hăäwí na'inbí pí'nă khó'yé gínkw'ó'di', hedího ûnhanginná háa i Yä'dâa'i P'oewaahâa natu'da'in, gá Yôesi Tádá nada' waagi i Yä'dâa'i P'oewaahâa-á Yôesi Tádáví t'owagí' iyûusu'odân.

Yôesidi na'in díséegítho hăäwídi wänbo há'to díwiyé-í ivi'wedi

²⁸ Nă'i wá' gínhanginná: Tobáháa napo' wänbo', nă'i hăäwí napo'idiho Yôesi-á híwó' ikhâymáa in to'wên i óséegi'ingí', innânkun ivi'in ûnmúnídi ovâytukánnan, í'ánshaamăgi waagi. ²⁹ Hăn'oebo ûnhanginná to'wên dimúní'in in ivi'in ûnpuwagít'óe'in, hedí iwéhpê'an indá ivi' ay Jesus ûnmuu'i waagibá dipúwí'in. Kindidiho Jesus wí pá'dây waagibá namúní

hedá naʼindá báyéki tíʼúuwín waagiʼinbá-á. ³⁰ In toʼwên haʼmin dipúwíʼin Yôesi Tádá iwéhpêʼan dimuuʼindá idi ovâytukánnan ivíʼin únúnídí, hedi ivíʼin únúnídí ovâytukánnandá natú tʼaywóʼdi wídâymáapíʼin waagiʼin dimuu, hedi náʼin tʼaywóʼdi wídâymáapíʼin waagiʼin dimuuʼin ovâytuʼannindá heʼennin ovâypáa-í, háa Jesus namuu waagibá.

³¹ Hedânkun, náʼi háäwí tʼähki iʼgedi gínhanginnândi, náä-á taʼgendi náʼin gínkoedi gitúnídí: Yôesi Tádá-á naʼinbíʼnäpiyeʼ namuudiho toʼwídí wänbo háʼto dítʼaaní. ³² Yôesi Tádá-á wínakhâapóepídí iví ay Jesus imági naʼin tʼowa tʼähkigiʼ nachúu-ídí. Hedi kin iʼandânkun, nakhâapídí tʼähki wéʼgeʼi híwóʼdi háäwí wáʼ taʼgendi dímäáni. ³³ Yôesi Tádá-ân namuu i natúʼdiʼ in toʼwên ovâydeʼmannindá tʼaywóʼdi wídâymáapíʼin waagiʼin dimuu, hedânho toʼwí wänbo wíʼúnkoedipí taʼgendi dítʼaywóʼdichänú-íʼin. ³⁴ Hediho toʼwí wänbo wíʼúnkʼóepí natúnídí naʼinbí tʼaywóʼdi gínmuudi gínkhâyʼäʼ dítuchänú-íʼin, gá Christ naʼin gimuudi nachuudân, hedá wiyá shánká háäwí-á iʼan, i-á nawáywówápóe-á, hedi náä-á Yôesi Tádáví koʼdínädá naʼân, hedi iwedí naʼingiʼ dînyûusuʼodiho Yôesi Tádá dîndaʼmáa.

³⁵ Christ-di díséegídí toʼwídí wänbo háʼto díwiyé-í ivíʼwedí, tobá âytʼôephadende wänboʼ, háa sehkanäwóʼ naʼinbí thaa gínmuu wänboʼ, háa naʼinbí whäyu gínmuudi tʼowadi díyanákiʼo wänboʼ, háa koegiʼ-á awegiʼ-á gíntáy wänboʼ, háa díwhaʼamíʼindá dítʼahänú-íʼindá tʼowa didaʼ wänboʼ. ³⁶ Kin gínpoʼ háa Yôesiví tãʼnin diwe

nata'muu waagi:

Na'inbí Sedó Yôesi, uví'in gimuudibo na'indá hãädi wänbo t'ähkí dít'akhanukhây'o'.

Wên k'úwá ovây't'ahánú-í'in gimuu waagi t'owadi dímaa.

³⁷ Hewänbo tobáháa ná'i t'ähkí gínpo' wänbo?, wéngedí wänbo wídít'aanípí, hewänbo na'indáho git'ampo', gá Christ i díséegí'i namuudân, hedí díkhäge'do'. ³⁸⁻³⁹ Naa dáykoedíwhäyunde hãäwídi wänbo há'to díwiyé-í Yôesi Tádávi séegí iwedi, ná'i séegí-á Jesus Christ na'inbí tsondi hay'i gínmuu'ídi dímägi. Tobá giwówayídi háa gichuu wänbo?, há'to iwedi giwiyedée-í. Makówáwin t'ôepa'aa'índi wänbo há'to iwedi díwiyé-í, háa p'oewaaahâaví tsonnindi hediháa wáy wíyá to'wí tsonkhuu imáa'ídi. Tobáháa napóe wänbo náa háa páadépiye' gimän diwe, háa hãäwí oepáa kw'áye hediháa nansoge núgé na'ändídi, háa wáy wíyá hãäwí nakhí'yendídi há'to iví séegí iwedi díwiyé-í.

9

Háa Yôesi Tádádi in Israel t'owagi' ovây'an waa

¹ Naa háa otugít'óe'indá ta'gen namuu, naa wídáyhòeyómáapí, gá Christ-ví' omuudân, hedá i Yä'dâa'i P'oewaaahâadá naví pí'ná khó'yé donmáadi díhangin'ândo ta'ge dáyhí'máa'in. ²⁻³ Naa hânho ok'áykháa, hedá naví pí'ná khó'yé hãädi wänbo t'ähkí otaachanpo' dáy'ánshaamáadi naví t'owaví'gedí, indá náa oepáa k'aydi naví maatu'in dimuu. Híhchangídi Christ-ví'wedá owiyedée-í, kin naa dînpóe'índi ovâykhäge'namídáho'. ⁴ Indá Israel-ví áy

iwedi⁷inbá dimuu, hedi Yôesi Tádádí ovâyhógi iví sówé⁷ây waagi⁷inbá dimúnídí, hedá idá iví sa⁷wó⁷di kohthay iví⁷wedi ún⁷ä⁷i⁷ ovâykeeyan. Háa iwéhpêe⁷annin in Israel⁷inbá ovâytu⁷an, hedá iví tsontuu-á ovâymägi. Ovâyýéye háa óe⁷a⁷ginmäänídí, hedá háa ovâykhâymáa⁷in ovâytu⁷an. ⁵ In hăn⁷oe⁷in se⁷daa-á nă⁷in Israel⁷inbí thehtáy pahpá⁷in dínmuu, hedi Christ nat⁷owapaa ihaydi inbí⁷wedi⁷ibá namuu. I-á Yôesi namuu, i-á t'ähkí itsonmáa, hedi t'owa dínkhây⁷ä⁷ hánhay wänbo t'ähkí óetége⁷bé-í⁷in. Hamân.

Háa Yôesi Tádá in Israel⁷in t'owa ovâytu⁷an waaho i'an

⁶ Hewänbo naa ok'áykháa gá tobá nă⁷i t'ähkí dâymáa wänbo⁷, Yôesi-ádí wídimuupídân. Naa wó⁷tú⁷pí Yôesi Tádá-á wí⁷i⁷a⁷ginpí⁷in iví tuu imägi⁷in, hewänbo kinnân napo⁷: Báyékí in Israel- ví ây iwedi⁷indá kodi⁷nin Israel⁷in wídimuupí, * ⁷ hedá wá⁷ t'ähkí in Hudíyo iwedi⁷indá Abraham-bí kodi⁷nin ây iwedi⁷in wídimuupí iví tûu ún⁷oe diwänpimuudíbo⁷, hewänbo kinnân Yôesi Tádádí óetu⁷an Abraham:

Uví ay Isaac úmuu⁷iví ây iwedi⁷inda⁷mânho ta⁷gendi uví tí⁷úugé kă⁷ä⁷ä⁷in kin ovâytu⁷âamí.

⁸ Nă⁷i hí⁷ kinnân natu⁷da⁷: T'ähkí Abraham-bí tûu ún⁷oe-á Yôesi Tádáví ây wídimuupí, hewänbo in to⁷wên háa Yôesi Tádá iví tuu imägi waa di⁷âypuyä⁷in, inbí⁷gedida⁷mân gitúní ta⁷gendi

* **9:6** Wí to⁷wí kodi⁷di Israel⁷i namúnídí únkhây⁷ä⁷ ta⁷gendi Yôesiví⁷piye⁷ iwähýú-í⁷in.

Abraham-bí ây iwedi'in dimuu. ⁹ Kinnânho Yôesi Tádádí iví tuu Abraham óemägi háa ônkhây máa'in: Wí paayo nää iwedi uví'piye' owáy'ää-i, hedi ihaydá uví kwiyo Sarah wí enúkay ho i'aypuyäkhây máa.

¹⁰⁻¹² Hebo Yôesi wiyá shánkí natú. Rebecca-di wên kwâati ovân'ayyan, hedi in áyyää-á wí'da' tádá dânmuu, i-á na'inbí thehtáy pahpâa Isaac namuu, Abraham-bí e'nú. Hewänbo wa'di in áyyää da'aypuyäpidíbo', wa'di háawên dân'anpidíbo', háa híwó'di háa híwó'pí', Yôesidi Rebecca kinnân óetu'an:

I páadé'i-á i tí'úuge'ígí' it'ôe'amí.

Hedi Yôesi-á kin i'an nahanginpúwídí i-ân namuu t'owa ovâyde'bo'i', háawên díví'annin namuudidá'ba yoe, hewänbo idânho to'wên napida'in ovâyde'bodân. ¹³ Yôesi Tádá-á iví ta'nin diwe kinnân natú':

Jacob-á dóde'man, hewänbo iví pá'dây Esau-á dóyoe'gi'an.

Wígínkhây'ähpí gitúní'in Yôesi-á híwó'pí i'o'in háa nada' waa i'odi

¹⁴⁻¹⁵ Hedân ti gitúní Yôesi Tádá-á ta'ge wí'i'opí wí to'wí óede'bodi hedá wiyá to'wí óeyoe'gi'odá' Hedân yoe. I-áho ûnkoedi kin i'amídí, hediho Moses óetu'an,

To'wí'piye' naa oda'i-áho o'iyapúwí,

to'wí'piye' osehkanäkanda'i-áho
dósehkanä'amí.

¹⁶ Hedânkun Yôesiví iya ûnmuudíbo wí to'wí ide'bo', ná'i to'wí óede'mamí'in nawänpida'díbo-á yoe, háa isó'díndedíbo-á yoe. ¹⁷ Yôesi Tádáví ta'nin diwá

ûnta?muu háa idi i Egypt-wi tsondi hay?i óetu?an waa, kinnân:

Naadi wînk'û? untsoncha?nídí

hedânho háa wíkhâymaa?in namuudi naví kay dînmuu?in donkeeyamídí,

hedá náä oepáa k'aydi t'âhkí t'owa háawi naa omuu?in dínhanginnání.

18 Hedânkun Yôesi háa nada? waa i?odi wáy wênbí?piye? na?iyapo?, hedá wây-á wëndá t'óyanpí?in dimúni gin ovâykannan.

19 Ma?di wí to?wídí dítsikáyi?ní naa, “Ha?wâagi Yôesi i?odá háadan idi in t'owa ovâyt'e?p'ídénde?? Tóebo wí?ûnkoedipí Yôesi óekhâ?amídí i?amídí háa nada? waagi.”

20 Hewänbo naadá i kin natû?di kinnân dótu?amí: “To-an unmuu Yôesi nâatwhännamídí, t'owa?ayda? unmuudi? Ti wí nat'údí ûnk'óe i nat'úpa?i? óetu?âamídí, ‘Wí?úkhây?âhpí háa omuu waagi naa dípaa-í?in? Hedân yoe. 21 I nat'úpa?i-á ûnk'óepí?an i pí?indi hääwí nada?i? ipáa-ídí. Ná?i pí?in diwedibo? ûnkoedi wên nat'ú sa?wó?gí?inda? ipáa-ídí, hedá wây-á hääháakangi?indá.”

22 Hedânho Yôesi Tádá wá? ûnk'óe kinnân i?amídí: Tobáháa nada? wänbo ikeeyamí?in hânho nat'ay?in t'owaví t'aywó?di dînmuudi, hedá iví kay ûnmuu?in âytáa-í?in nada? wänbo-á, owáy oedi i-á nabo?atâdí itsíkha?o? ovâytuchänú-ídí in to?wên inbí t'aywó?di dînmuudi nat'aydi, inbáho? ovâyhánú-í?in dínkhây?ä?. 23 Hedá wá? nada? in to?wên iví iya ônhógi?in ovâyhangin?ânnamí?in háa hay?i i namuu?in, inbá páadédíbo? ovâyde?man báyéki híwó?di hääwí dâyhónídí. 24 Hedi na?innân

gimuu in Yôesi Tádádí dítukánnannin iví iya áyhónídí. Wáy wëndá Hudíyo gimuu, hewänbo wây-á wíginuupí. ²⁵ Kinnân Yôesi Tádá natú, hedí Hosea-á hăn'oe ita'nan:

In to'wên naví t'owa dínmuupí'indáho
naadi dovâytu'ámí naví t'owa gin.

In to'wên naadi wíðovâyséegípíwän,
indá nää-á in to'wên dovâyséegí gin
dovâytu'ámí.

²⁶ Hedí wáy Yôesidi wáymûu ovâytu'an diwe, “Undá naví t'owa wí'ímuupí” gin,
iwebáho nää-á ovâytu'âámí “Yôesi i
nawówáyí'iví ây” gin.

²⁷ Hedá hăn'oe Isaiah-á in Israel t'owaví'gedí
kaygí'di natú:

Tobáháa in Israel-win t'owa hânho báyékí diyi
wänbo?, háyú okhá i mâap'oe k'áygé ð'ge
nakw'ó' dihaybá,
wên háyúdída' ovây'aywoení,

²⁸ gá Na'inbí Sedó Yôesi-á wínahayyêepúwípídí iví
tuchänu ibowá-ídí nää oepáa k'aydí, háa
natú waagi.

²⁹ Isaiah wá' natú kinnân napúwí gin:

Na'inbí Sedó i hääwí t'ähkí itsonmáa'i namuu'idí
wên tí'úugé kã'ää'in dínyoe'anpídá,
giháäníwän in t'owa Sodom búu'úwindádí
Gomorra-hwindádí t'ähkí dihán waagibá.

In Hudíyo Yôesiví'wedi dipedee

³⁰ Hedího háa ots'antú waa kinnân natú'da': In t'owa Hudíyo dimuupí'in dívíwhâyundedí dipóe in to'wên Yôesi Tádádí ovâyçhaámáa'in t'aywó'di wíðây máapí waagi, tobáháa hádídí kí'min

dipúwí'in dâytuwämäapí wänbo? ³¹ Hewänbo in Israel-'indá dâynuwände hádídí t'aywó'di wíðâymäapí'in waagi'in dipúwí'in, hewänbo wíðâyshaadepí. ³²⁻³³ Hedi háadan wíðâyshaadepí? Gá dívíwänpiwhäyú-íví'wedi dívíkhäädédân híwó' díví'amídí hedânho Yôesidi ovâyçhaamá've-ídí t'aywó'di wíðâymäapí waagi. Wí k'uu Yôesi Tádáví ta'nin diwe i'gedi nata'muu'i' iwe dip'idedi dikanu waagibá dínpóe. Kinnân natû':
Bít'óyan, oe Zion búu'ú iwe wí dósóge.

I-á wí k'uu waagi'ba namuu, t'owa iwe dip'idedi dikanunde?
hewänbo to'wên iví'piye' dívíwhäyunde'indá há'to dicanpúwí híwó'pí'piye' dívíwhäyunde'in.

†

10

¹ Tí'úuwín páadé'in, pín ta'ge haydi Yôesi Tádá dóda'máa naví t'owa in Israel-'in dimuu'in ovây'aywoenídí. ² Ta'gendi wâytumáa, indá hânho dida' Yôesi óehíhchanmäáni'in, hewänbo piháa dívisó'dinde díví'amídí. ³ Ho wíðínhanginnáhpí háa Yôesi i'o'in hedânho idi t'owa ovâyçhaamá've-ídí t'aywó'di wíðâymäapí waagi, hediho indá dâytuwämäa hádídí ha'min wí'bo dívípipáa-ídí, hediho háa Yôesidi kin ovây'amí'in wíðâyhóndepí. ⁴ Nääho t'ähkí in to'wên Christ-ví'piye' dívíwhäyunde'indá wiyá ho wíðíntáypí dívisó'dêe-ídí i tsontuu dâ'y'a'ginnamídí hedânho dipúwídi in to'wên Yôesi Tádádí ovâyçhaamáa'in t'aywó'di wíðâymäapí waagi.

† 9:32-33 Christ-á i k'uu namuu, hedi iví'piye' wíðíwíwhäyundepídi dikanunde waagibá dínpóe.

5 In t'owa dívísó'dінде'in Yôesiví tsonttuu dâý'a'ginnamídí hedânho Yôesidi ovâyçhaamá've-ídí t'aywó'di wíðây máapí waagi, inbí'gedi Moses kinnân ita'nan:

Wí to'wí t'ähkí Yôesiví tsonttuu i'a'gindo'i-á wówátsi imá've-í.

6 Hewänbo kinnân nata'muu in to'wênbí'gedi inbí whäyü dínmuudi Yôesidi ovâyçhaa'in t'aywó'di wíðây máapí waagi:

Wí'ítúnípi, "To'wí ûnkhây'ä' makówápiye' napée-í'in."

(Nä'indá natu'da', Christ óedaa'amídí makówáđi nawhaye'ä-ídí.) Hedá wá' nata'muu:

7 Wí'ítúnípi, "To'wí ûnkhây'ä' in chu'in dikw'ó' diwepiye' nawhání'in."

(Nä'indá natu'da', in chuwa'inbí'wedi Christ óetegé-ídí óewówápaa-ídí.) 8 Hewänbo kinnân nata'muu:

Yôesiví tuu-á undádího nayí',

unbí sóedí ítúní hedí unbí pí'ná khó'yé-á bînmáa.

Hedí nä'i tuu whäyü i'gedi namuu'i-á t'owa âyt'ôe'o'. 9 Hedânkun t'owaví páadépiye' ítúđi Jesus-á i shánkí natsonyi'i namuu'in, hedá Yôesi Tádádí wíyá óewáywówápaa'indá unbí pí'ná khó'yé-á úvíwhäyundedi, wovây'aywoení, 10 gá na'inbí pí'ná khó'yé Jesus-ví'piye' ívíwhäyundedá Yôesi Tádádí díçhaamáa t'aywó'di wí'ây máapí waagi, hedí ivi'piye' ívíwhäyunde'in gitúdá, dîn'aywoení. 11 Yôesiví ta'nin diwá ûntû',

In to'wên ivi'piye' dívíwhäyunde'indá há'to dichanpúwí híwó'pí'piye' dívíwhäyunde'in.

12 T'ähkí t'owagí? handá? napo?, in Hudíyogí?indá, in Hudíyo dimuupí?ingi?indá wá?, gá t'ähkí t'owagí? wí?dä? wí shánkí natsonyi?i na?ändän, hedi idá báyéki híwó?di ovâymä? in to?wên iví?piye? dívíyûusu?annin ovâykhäge?namídí. 13 Yôesiví tã?nin diwá ûntû? waagi:

To?wên i shánkí natsonyi?iví?piye? dívíyûusu?andi di?aywonda?póedí idá ovây?aywoení-ákun.

14 Hewänbo hádídan iví?piye? kin dívíyûusu?amí iví?piye? wídívíwhäyundepídí, hedá hádídan dívíwhäyú-í iví?gedí wídínhanginnáhpídí, hedá hádídan dínhanginpúwí to?wídí iví tų wí?ovâyt'ôe?anpídí, 15 hedá hádídan wí to?wídí ovâyt'ôe?amí Yôesidi wí?óesanpídí? Kinnân Yôesiví tã?nin diwe nata?muu:

In to?wên wí híwó?di tų dâymáyä?inbí ahtaa-á sa?wó? dínkeet'ôe.

16 Hewänbo Isaiah natú waagibá, t'ähkí in Hudíyo Yôesiví híwó?di tų wídâyséegi?anpí. Kinnân itã?nan:

Na?inbí Sedó Yôesi, wên häyúhaydida? t'owa i hääwí naví?wedi dit'oe?i? dívíwhäyü.

17 Hedánkun Yôesiví?piye? ívívíwhäyú-ídí, gíntáy iví tų git'ôe-ídí, hedá nã?i tų-á git'o? wí to?wídí Christ-ví?gedí dít'ôe?odi.

18 Héyâa in Israel-?in, ti Yôesiví tų wídít'oe?an? Dít'oe-ákun, Yôesiví tã?nin diwe ûntû? waa:

Yôesiví tų-á nää oepáa k'aydi t'ähkí ûntųmää, hediho t'owa t'ähkí wáyýé t'ähkí dikw'ó?nin nã?i tų dínpówá.

19 Hedânkun in Israel-[?]in dínhanginnândákun háa Yôesi ikhâymaa[?]in. Kin Moses páadé ita[?]nan háa Yôesidi ovâytu[?]an waa:

Wây-á pi[?]wên t'owa dimuu[?]in naadi
dovây[?]aywondibo wâythúukannamí,
Háa há[?]in t'owa hangintan dâymáapí[?]ingí[?]
dovâykhâymaa[?]in namuudi wây[?]t'e[?]ya[?]namí.

20 Hedá Isaiah-á shánkí kay[?]indá ihí[?]máadi ná[?]i
Yôesiví hí[?] ûntú:

In to[?]wên naa wídítuwämáapí[?]indi naa díshaa.

Inbí[?]piye[?] dáykeeyan, naví[?]gedi ditsikayipí
wänbo[?].

21 Hewänbo in Israel t'owavi[?]gedi Yôesi kinnân
ihí[?]máa:

Häädí wänbo t'ähkí okhóewaa[?]än ná[?]in t'owa
dovâyséegí[?]amídí,
tobá wídí[?]a[?]ginmáapí wänbo[?]
hedá naví[?] tuj dînyoegi[?]o wänbo-á.

11

*Yôesidi in Israel-[?]in ovâyséegísehkanä[?]andiho wáy
wên in ovâyde[?]man*

¹ Hedího ti gi[?]âaní Yôesi Tádá iví Israel-[?]in
t'owa iyoegi[?]annin? Hedân yoe. Naa wá[?] Israel-
wibá omuu, naa-á Abraham-bí ây iwedí[?]ibá
omuu, hedá Benjamin-bí t'owa iwedí[?]bá omuu.

² Hedího Yôesi-á iví t'owa wí[?]iyoegi[?]anpí, indá
hän[?]oebo ûnhanginná iví[?]in ûnmúní[?]in. Ta[?]gendi
un ûnhanginnáhpí[?]an háa iví ta[?]nin diwe Elijah-
ví[?]gedi ûntú[?]nin. Elijah-di in Israel-[?]inbí[?]gedi
Yôesi óehí[?]máadi kinnân ovây[?]t'e[?]p[?]íde:

³ Na[?]inbí Sedó, t'ähkí in wé[?]ge[?]in uví tukhe[?]min
wônt[?]ahánú,

hedá t'ähkí uví antâa-á wônnyu.
Naada'mân ote'dee, hedí t'owa hádídí naa
díhéyí'in dituwäyi'.

⁴ Hedí kinnân Yôesidi óetu'anpí'an:

Tsé maapaasôn (7,000) ihay senä' dovây'áyíngimáa
hedí wa'di naví'näpiyebo dimuu,
indá Baal-ví páadépiye' wídívídé'gendikw'ódipi
óe'a'ginmäänídí.*

⁵ Nää wa'di hanbo napo'. Yôesi-á
naséegísehkanát'óedí wa'di wên háyú haydí
Israel-'in Yôesidi ovâyde'mannin dikw'ôn.

⁶ Hewänbo iví séegísehkanä ûnwänpimuudibo Yôesidi
ovâyde'man, hääwí híwó'di díví'andidída'ba
yoe. Hedí hääwí híwó'di indá díví'andidibo
idi ovâyde'mandáho', há'to iví séegísehkanä
ûnmuu'idída' ovâyde'mamíwän.

⁷ Hedího kinnân napóe: T'ähkí in Israel-
win t'owa wídínhanginpóepí hádídí dipúwí'in
in to'wên Yôesidi ovâychaamáa'in t'aywó'di
wídâymapí waagi, hewänbo in to'wên Yôesi
Tádádí ovâyde'mannindáho dínhanginpóe, hedí
in wé'ge'indá t'óyanpí'indá' dipóe. ⁸ Yôesi Tádáví
tä'nin diwá ná'in wé'ge'in t'owaví'gedí kinnân
nata'muu:

Yôesidi inbí hangintan ovâypedee'an,
hedí tsée nakeet'óepí'-á, oeyay nat'o'pí'-á
ovâymägi,

hedí nää thaa pu'wahay kinbo dínpo'.

⁹ David wá' hán'oe inbí'gedibá natú,

* **11:4** Baal-á wí hääwí wí sen waagibá ûncháa'i namuu, i-á in
wé'ge'in t'owa dâykhiyé inbí yôesi dínmúnídí.

Báyékí hääwí dínkw'ó'dibo di'ánde híwó' dínpo'in,
 hewänbo Yôesi dóda'máa ná'i hääwí
 dínkw'ó'dibá wên phay iwe diwhêe'in
 waagibá dínpúwídí,

háa hääwí iwe dip'ídedí waagibá dínpúwí iwe
 dikanú-ídí,

hedá iwebo inbí tuchänu dín'ä'i-á dâyhóní.

10 Ditsíkhämugí't'óe waagibá dínpúwí hedânho
 wídínkeet'ôenípídí,

hedá häädi wänbo t'ähká inbí túu'ú-á
 dínbé'gayní dínhékhháadí waagibá.

11 Hedího hânnan natu'da' ná'i otú'i'? Ti
 natu'da' ná'in Israel-'in t'owa dikanu'in wiyá
 há'to dikwinudée-í waagibá dínpóe? Hedân yoe.
 In Israel t'owaví t'aywó'di dínmuudiho Yôesidi
 in Israel-'in dimuupí'in t'owa-áho ovây'aywon,
 hedí iwediho' in Israel-'in t'owa wá' hânho didá'í
 hanbá dínpúwí'in. 12 In Israel-'in t'owa pedee iwe
 dipówádí Yôesiví'wedí dívihânge'an, hebo iwedi
 t'ähkí in wé'ge'in t'owa Israel-'in dimuupí'in
 Yôesiví tuu dâyhógi, hedí handidân dikodit'owapaa
 waagi'inbá dipóe. Hedího owáy in Israel-win
 dívíwhâyunde'in shánkí báyékí dipóe ihaydá, in
 wé'ge'in t'owa-á wá' wiyá shánká híwó' dínpúwí.

In t'owa Hudíyo dimuupí'in ovây'aywoeni

13 Un Hudíyo ímuupí'in, náa-á undá
 wâyhí'khâymaa: Yôesi Tádádí naa unbí'piye'
 dísan, hedího naa ochanpo' naví t'ôe-á báyékí
 dín'a'ginmuu'in. 14 Hääwên naadi wây'o'in
 namuudi, ma'di in to'wên naa waagibá
 Israel-'in dimuu'in wá' hânho didá'í i tuu
 un wâymä'i dâyhónídí, hedí kindidi wáy wên

in wáʔ ovâyʔaywoení. ¹⁵ Yôesi Tádádí in Hudíyo ovâyyoegiʔan dihaydi idi in wéʔgeʔin t'owa t'ämäpiyeʔ nää oepáa k'aydi dithaaʔin ovâyk'emahógi. Hedânkun owáy idi in Hudíyo ovâywáyséegiʔan dihaydá, shánkí wänbo híwóʔ namúní, ihaydá indá chuʔin diwáywówápóeʔin waagiʔinbá dimúní.

¹⁶ I páadéʔi pává dâywahakêʔi Yôesi óemägidá, t'ähkí i wéʔgeʔi pává wáʔ ivíʔdaʔ ûnmuu. Hedá i taypúu Yôesi óemägidá, i waʔyáy khóe wáʔ ivíʔbá ûnmuu. † ¹⁷ In Hudíyo wên olive tay óekhähkíidiʔin waagiʔinbá dimuu, hewänbo wáy wên in diwedi waʔyáy khóe dâytsʔáʔi waagiʔinbá dimuu, hedi un Hudíyo ímuupíʔindá wên olive tay nawänpisôeʔinbí waʔyáy khóe waagiʔinbá-á ímuu, nãʔi waʔyáy dâytsʔáʔi-á i wéʔgeʔi waʔyáy-ádí dâywänpit'ihśaa, hediho i taypúu iwediwi tayp'oedi i waʔyáy khóe dâyt'ihśaaʔi híwóʔ nasôemän waagibá, nää-á hanbá häawí in Hudíyo iwedi naʔäʔidi híwóʔ undá wáʔ úpoʔ.

¹⁸ Hediho nää-á wíʔiʔâanípí i wéʔgeʔi waʔyáyví shánkí híwóʔnin ímuuʔin. Wíʔúvíyêngihéeʔamípí, undá waʔyáy khóe waagiʔindaʔ ímuudi, hediho nãʔi tayp'oe wíwînmähpí i taypúu nawówámúnídí, i taypúudân un unbí wówátsi khóekhuú-á wovâymäʔ.

¹⁹ Hewänbo maʔdi wí Hudíyo namuupíʔ-á kin natúní, “I wéʔgeʔi waʔyáy khóe-á óetsʔáʔ hedânho naʔin dít'ihśaa-ídí.” ²⁰ Nãʔindá

† 11:16 I páadéʔi pává-á in taypúu-á in Hudíyoví páadé kãʔäʔin t'owa Yôesidi ovâydeʔmannin waagiʔbá namuu, hedi i wéʔgeʔi pává-á waʔyáy khóe-á in shánkí tíʔúge kãʔäʔin Hudíyo waagiʔbá-á namuu.

ta'gen namuu. In Hudíyo ovâyts'â' gá Christ-ví'piye' wídíwíwhäyupídân, hedi undá unbí whäyü únmuudi wovâyt'ihsaa. Hewänbo úvíyêngihí'má've-íví'wedi únkhây'ä' hânho úví'áyîngi'amí'in. ²¹ Yôesidi in Hudíyo ovâytuchänu, tobá in tayví kodí'di wa'yáy khóe waagi'inbá dimuu wänbo', hediho háa díví'an waagibá úví'odáho hanwaagibá un wá' wovâytuchänú-í.

²² Hediho iwedi nakeepo' Yôesi-á t'owaví'piye' hânho híwó'di namuu'in, hewänbo wáy wênbí'piyá kháa'i namuu. In to'wên iví'wedi dívíhänge'annindá ovâytuchänunde', hewänbo unbí'piyá híwó'di namuu, hedi ná'i híwó'di wovây'o'i bînséegíkéndedá kin waagibá wa'di ikanhûuwí. Hewänbo bînséegíhógipídá un wá' wí wa'yáy khóe waagibá wovâyts'âa-í. ²³ Hedi in Hudíyo ovâyts'â'in díví'egó'andáhá' wiyá dívíwhäyudá, Yôesi Tádádí ovâywáy't'ihsáa-í, gá i-á ûnkoedidân han i'amídí. ²⁴ Hedânkun un t'owa Hudíyo ímuupí'in wên olive tay napisôe'inbí wa'yáy khóe waagi'inbá ímuu, hedi iwedi wovâyts'â'di wây-á olive tay óekoe'in deedi wovâyt'ihsaa, tobá páadédí iwedi'in ímuupí wänbo'. Hediho shánkí wínabâpu'wanpí in Hudíyo in tay eedibá ovâywáy't'ihsáa-í, gá indá in tayví kodí'di wa'yáy khóe waagi'inbá-á dimuudân.

Yôesi-á t'ähkí t'owaví'piye' nasehkanäpo'

²⁵ Tí'úuwín páadé'in, naa oda' un Hudíyo ímuupí'in wên ta'gen ní'gedí íka'pówá-í'in, hedânho únhanginnândi

wí'úvichaa'âamípi. Náwehaydi ná'in ta'gen wa'di wínaka'powamuupí, hedi kinnân in namuu: Tâhki in Israel-win t'owa há'to hãädi wänbo t'âhki yoegikannin dimúni, hewänbo báyéki in Hudíyo dimuupí'in t'owa Yôesiví'piye' dívíwhäyu iwéhayda'mân ha'min dimúni. ²⁶ Hedi owáy ná'in wé'ge'in t'owa Yôesiví'piye' di'ää ihaydânho t'âhki in Israel-'in wá' ovây'aywoeni. Yôesi Táđávi ta'nin diwe ûnta'muu háa i natú'in:

I aywondi-á Zion diwedi nakä'äagit'óe,
hedi in Israel-'inbí yä'dâapíkan ovâyya'amí.

²⁷ Hedi owáy inbí t'aywó'di dovây'owóyé ihaydáho háa ingí' dovây'amídi dówéhpê'an waa napúwí.

²⁸ Yôesiví híwó'di tuu in Hudíyo dâyyoegi'andi náä-á Yôesiví hânmin dipóe. Hewänbo háa díví'annin namuu'indi un Hudíyo ímuupí'in wovâykhäge'nän Yôesi bîntáa-ídi. Hewänbo Yôesidi ná'in Hudíyo t'owa ovâyséegi gá iví hehãäwin thehtáy pahpá'in ovâyde'mandân. ²⁹ Yôesidá in to'wên ovâyde'mannin wí'ovâyyoegi'opí, hedá i hãäwí híwó'di ovâymägi'i wí'ovâykweedepí.

³⁰ Wáymûu un Hudíyo ímuupí'indá Yôesi Táđá wívîn'a'ginmáapi, hewänbo náä in Hudíyodi óe'a'gindopídiho unbí'piye' na'iyapo'.

³¹ Hanwaagibá in Hudíyodi náä Yôesi wí'óe'a'gindopí, hewänbo unbí'piye' na'iyapo'di inbí'piye' wá' na'iyapúwí. ³² Yôesi-á natú t'âhki t'owadi wí'óe'a'gindopídi inbí t'aywó'di dínmuu'idiho pan waagi'inbá dipaa, hedi kindidi t'âhki t'owa handa' ovâymáadi t'âhkiví'piye' na'iyapúwí.

Gínkhây'ä? Yôesi Táđá âytegé-í'in

³³ Yôesi-á hânho hay'i namuu. Iví hangintandá há'i-á hânho báyéki únmuudi há'to âytaayamí, hedí há'to gínhanginnání háadı́ háa hândidi i'o' háa ikanhonnin. ³⁴⁻³⁵ Iví tạ'nin diwe ûntạ'muu waa:

To'wí wânbo wí'ûnhanginnáhpí háa Yôesi Táđá na'ánshaamuu'in,

to'wí wânbo wí'ûnkoedipí óetumakhemääníđí.

To'wí wânbo wí'ûnkoedipí natúníđí, "Naadı́ háäwí Yôesi dómägi,

hedânho i-á ûnkhây'ä? díwáywá'âa-í'in."

³⁶ Yôesi-áho háäwí t'ähkí ikhíyé. Háä t'ähkí wa'di namän Yôesiví mange imáadı́, hedá háä t'ähká iví'-á únmuu. Hedího hânhay wânbo t'ähkí kw'ááyébo? âymá've-í. Hamân.

12

Yôesiví'piye' pín ta'ge hayđi ívímääní

¹ Tí'ûuwín pááđé'in, Yôesidi iví séégísehkanä wovâykeekw'óđi, hedího ná'in namuudi kaygi'di kinnân wâytumáa: T'owađi in animâa dâyt'ahánú'in Yôesi óemä', hedí han waagibá unho unbí túu'ú úvímääní, hewânbo wówá'innân, hedá wá' yä'dâa'inda' ímúni hedânho bínhíchchanmääníđí. Kindidân unbí pí'nă khó'yé Yôesi bîn'a'ginmääní. ² Háa in t'owa Yôesi dâytaapí'in díví'o waagibá wí'úvikanhûuwípí, hewânbo binmää Yôesidi ánskaa ts'aqabi wovâyymääníđí, hedí handidiho unbí wówátsi wovây'egó'amíđí. Kindidânho únhanginpúwí háa Yôesi nada'in úví'amí'indá

híwó'ⁿinda' namuu'in, hedá óehíhchando'ⁿindá, hedá t'ähkí ta'gennindá.

3 Hedí Yôesidi naa dînk'û' un wí'inbo nă'in wâyumakhe'amídí: Wí'í'âanípí he'ennin ímuu'in ha'min ímuupídí, hewänbo ta'gendi unbí'gedí úví'ánshaa'amí, hedânho únhanginnánídí háa únkoedi úví'amídí i whäyü Yôesidi wovâymägi'idi.

4-5 Na'inbí túu'ú-á häyüdübo gínpa'an, hewänbo nă'i hääwí-á handa' wí'it'ôe'opí. Hanwaagi'inbá na'in gimuu. Tobáháa báyékidí giyi wänbo wí'da' waagibá gimuu, gá Christ-ádí wí'da' gimuudân, hedá giwhi'kw'ó wéhpêe túu'ú gimúnídí waagibá.

6 Yôesidi pí'dinbo magan dímägi, hewänbo t'ähkí ha'bidá' wígínmuupí. Wí to'wí únkoedídi wí Yôesiví tukhe'bi waagibá ihée'amídí, i-á únkhây'ä' kin i'amí'in häyü iví whäyü ünmuu ihay iwedi.

7 To'wí méesatewi khäge'di' namúní'in únkoedi'i-á únkhây'ä' híwó i'amí'in. To'wí Yôesiví tuu ovâyhá'amí'i namuu'i-á únkhây'ä' híwó' ovâyhá'amí'in.

8 To'wí natumakhehá'i-á únkhây'ä' iví tumakhe imääní'in. To'wí iví hääwí únkw'ó'di iwiyendedí wé'ge'indádí, i-á pín ta'ge haydi ovâymääní. To'wí óetsondisóge'i namuu'i-á únkhây'ä' hânho it'ôe'amí'in. To'wí in sehkanäwó' diwówayi'in ovâykhäge'do'i-á únkhây'ä' híhchangídi kin i'amí'in.

9 Un Únkhây'ä' ta'gendi bînt'owaséegíhûuwí'in, wänpidída'ba yoe. I hääwí t'aywó'di namuu'i-á bînyoe'amí hedá hääwí yä'dâa'i namuu eedá téegi t'aagá úvítsaasáa-í.

10 Wí'nă táye úvíséegíhûuwí tí'úuwín páadé'in dínkhây'ä' waagi, hedá úví'a'ginmá've-í häädi wänbo t'ähkí.

11 Wí'íbâa-ípi, hewänbo pín ta'ge haydi Na'inbí Sedó Yôesigi' úvít'ôe'amí. 12 Yôesivi híwó'di háäwí wovâypägit'ôe'i bîntsíkha'máadíbo' íhíhçaa-í. Bînt'ôephadende wänbo bíyää'an. Háädi wänbo t'ähki úvíyûusu'âamí. 13 Yôesivi t'owa háäwí díntáy'indádi i háäwí únk'w'ó'di bînwiyé-í, hedá unbí k'aygipiyá bînséegi'amí.

14 Yôesi bîndaa'amí idi híwó'da' ovây'âamídi in to'wên wovây't'ôephadekando'in. Híwó' gin otú, híwó'pí-á yoe. 15 Wí to'wí nahíhçaa'i-ádíba íhíhçaa-í. Wí to'wí naséeyidá i-ádíba úvísihtä-í. 16 T'ähkídi handa' úvímá've-í. Wí'úvíyêngi'ánshaamá've-ípi, hewänbo in wäphade kw'áye'in dimuupi'indádi úvíwóeni. Wí'í'âanípi háä t'ähki íhá'in.

17 Wí to'wídi yanáki wovây'odá yanákídíba wívînwa'âa-ípi. I háäwí t'owa t'ähki dínhanginná'di híwó'di namuu'indá bîn'âamí. 18 Unnânho únk'ôe úvíkhä-ídi hedânho nakoedidáho t'ähki t'owa-ádi tsaaginpidíbo unbí wówátsi bînhúwí. 19 Un wâyséegi'in, ná'in wâytu'amí. In t'owa un wovâywha'o'in wívînwha'amípi, hewänbo Yôesivi'we binyoe'an ná'i tuchänu, gá Yôesivi ta'nin diwe kinnân ûnta'muudân:

“Naa-ân dînk'ôe t'owa dovây tuchänú-ídi,
 naa-ân dînk'ôe dovây määnídi háäwí dín'ä'i',”
 kin Na'inbí Sedó Yôesi natú.

20 Kin wá' nata'muu:

Uví hânbi nahâhsêndi nákoegi'mää,
 hedí nap'oesá'aadá náp'oemää.

Kin úví'odá i-á hânho nawôeda'póedí iví wôeda'di
 óephahánunde waagibá nachanpúwí.

21 Wíwîn máäní pí háäwí yä'dâapí' namuu'idí wovây't'aanídí, hewänbo híwó' úví'odibo yä'dâapí' háäwí namuu'i' bînt'aaní.

13

Gínkhây'ä' in tsonnin äy'a'geeni'in

1 Na'in t'ähkí gínkhây'ä' in to'wên dítsonmáa'inbí khómapho' ívkw'ôení'in, gá Yôesi natúdiho gíntsonninkw'ôndân, hediho Yôesidânho inbí tsonkhuu ovây'mä'. 2 Hedânkun to'wídí in to'wên dâytsonkhuumáa'in ovây'a'gindopídí, háäwí Yôesi ik'û'i wänbo wí'i'a'ginpí, hedi wí to'wí kin i'o'i-áho óetuchänú-í. 3 In to'wên híwó' díví'o'indá in tsonnin wíđâykhuwôeda'ípí, hewänbo in yanákí díví'o'indáho dikhuwôeda'í. Hediho i to'wí natsonnándi' wíwínkhuwôeda'ípí'in ídádáho', híwó'da' úvíkanhúuwí, hedi unbí'gedí híwó'da' ihée'amí. 4 I-á Yôesiví t'ôe'i waagi'ba namuu, i-á unbí híwó'gí'da' i'o'. Hewänbo úvíyä'dâapí'odá, íkhuwôeda'í, ná'i tsondi-á wên ta'gen ûnk'óedí wovây'tuchänú-ídí, gá Yôesiví t'ôe'i waagi'ba namuudiho tuchänu imáyä'dân in to'wên dívíyä'dâapí'o'ingí'. 5 Hediho un únkhây'ä' in tsonnin dimuu'in bîn'a'ginnamí'in, hewänbo i tuchänu bínkhuwôeda'diđa'ba yoe. Shánkídí bîn'a'ginnamí gá unbí pí'ná khó'yé un únhanginnândân ná'indá in ta'ge'in namuu'in.

6 Hediho i tax chá' in tsonnindi wovâyphahsande'i-á úvíwá'ánde', gá indá inbí t'ôe dâyođibo Yôesigí' waagibá dívít'ôemáadân. 7 Hediho in t'ähkí bînmááni háäwí dín'ä'i'. Háäwí in tsonnindi wovâyphahsande'i t'ähkí úvíwá'âa-í,

hedá in to'wên in tsonkhuu dâymáa'indá hânho-á bînpí'a'geení.

T'owa âyséegíhûuwí hedá híwó'dá íví'amí

⁸ Únkhây'ä? unbí séegí wí'nă táye hăädi wänbo t'ăhki íphaamúní'in, hewänbo wíyá hăäwí wänbo-á yoe. Wí to'wídi t'owa ovâyséegíhondáho?, kindidi t'ăhki Yôesiví tsontuü ôn'a'gindo?. ⁹ I tsontuü kinnân namuu:

Wíyá to'wíví sedó-ádi háa kwiyó-ádi
wí'úvíwhqkwomá've-ípi,

wívint'owat'ahánú-ípi,

wí'úvísă'mâamípi,

thúudi wíyá to'wíví hăäwí wí'ída'ípi,

hedá wíyá hă'bi tsontuü wá' nakw'ó. Hewänbo t'ăhki nă'i tsontuü wé'ge wên wéhpêeda? tsontuü waagi'ba namuu, kinnân:

Háa un wí'bo úvípíséegí waagibá, wé'ge'in t'owa wá' bînséegíhûuwí.

¹⁰ Wí to'wí t'owa t'ăhki iséegí'i-á há'to wíyá to'wí yanăki óe'amí. Hedího ta'gendi bînt'owaséegídá, kindidi t'ăhki i tsontuü bîn'a'gindo?.

¹¹ Nă'i wăytü'andi-á úví'âamí, gá únhanginnândân hăädi naná'nin. Năä-á shánki tso'wa naná Jesus nawáypówá-ídi dîn'aywoenídi páadé iví'piye? ívits'anwhăyü ihaydiví'wedi, hedího năä-á ihaydiho nanân iyósa'wó-ídi waagibá namuu. ¹² Năä-á wa' nawáypówápídiibo

gínkhüuná waagibá gínpuwamän, hewänbo i khüü naphademän hedí nathay'ä? kin waagibá napo?, hedího i t'aywó'di in t'owa nakhüuná? dihaydi díví'o'i? âyoe'amí, hedí sundado inbí kwăk'u hân aadi di'aamuu'in waagi'inbá gimúní, nathayná?

diwe ívíyíyé-ídí. ¹³ Nää-á t'owa thaadi dínkhây'ä? waagibá, híwó? na'inbí wówátsi áyhúuwí. Wáy dínshánkí'dipo?di dívít'aywó?do? eeye wí'ívímá've-ípí, wígisuwátsit'ôenípí, tsé waagi'inbá wígiyêenípí, wí'ívít'aymá've-ípí, hedá wí'ívíthúumá've-ípí. ¹⁴ Hewänbo wí kwäk'u hân aadi wovây'áyîngi'o waagibá, Na'inbí Sedó Jesus Christ-dân wí'bo wovây'áyîngi'amí, hedí i t'aywó?di kaygi?di íkanda? j'gedí wí'úví'ánshaamá've-ípí.

14

Wí'nä táye wí'ívítuúsúumá've-ípí

¹ Wí to?wí iví whäyü kay'in wí'ûnmuupí wänbo binséegíke?, hewänbo hääwí híwó? naka?póya?pí j'gedidá? i-ádí úvítuhänmâamídá yoe. ² Gá kinnân: Ma?di wí to?wí iwähäyunde? hääwí koegí? namuu wänbo ik'oedi wí'it'aywó?dopi'in, hewänbo wiyá to?wí iví whäyü kaypi'in ûnmuu'i-á wí'ípívík'ohpí. * ³ I to?wí koegí? t'ähkí ik'o'i-á wí'ûnkhây'ähpí na'âaní'in i to?wí ipívík'ohpí'ví hânho shánkí híwó?di namuu'in, hedí i to?wí ipívík'ohpí? wá? wínatúnípí ipívík'o'i-á yä'dâapí i'o'in, gá Yôesidi i wá? óeséegímáadân. ⁴ U-á wí'úk'óepí wiyá to?wíwí t'ôe'i mântuúsúu'amídí. I t'ôe'iví tsondidá?mân ûnk'óe óetu'amídí háa híwó? háa híwó?pí? i'o'in. Hedí ta?gendi Na'inbí Sedóví t'ôe'i híwó? i'amí, gá Na'inbí Sedó ûnkoedidân óekhäge?namídí.

⁵ Hedá wá? ma?di wí to?wí nachanpo? wí thaa shánkí na'a?ginmuu wé?ge'i thaaví?wedí, hewänbo wiyá to?wí-á nachanpo? t'ähkí thaa ha?bi thaada?

* **14:2** Nää'i píví j'gedí ihí'máa'i-á t'owa inbí yôesi dâymägi.

naná'nin. Gínkhây'ä? wí'ínbo ívípi'ánshaamääní'in nã'in ni'gedi. ⁶ I to'wí wí thaa wíyá thaaví shánkí i'a'gindo'i-á Na'inbí Sedó óe'a'ginnamidân i'o'. Hedi i to'wí t'ämägi' koegi' ik'o'i-á wá' Na'inbí Sedó óe'a'geenídí kin i'o', gá i koegi' óemägidi Yôesi óekú'daa'odân, hedi i to'wí wí hääwí ik'ohpí'-á Na'inbí Sedó óe'a'geenídí kin i'o', i wá' nakú'daapóedí kinbá i'o'. ⁷⁻⁸ Tobá giwówayidi háa gichuu wänbo?, wí' wänbo na'ingí'da'mân kin wí'ívi'opí, gá giwówayidá Na'inbí Sedógi'-ân giwówayi?, hedi gichuudá Na'inbí Sedógi'βά gichu'. Hediho tobá giwówayidi háa gichuu wänbo Na'inbí Sedóví'inda? gimuu. ⁹ Christ nachuu hedá nawáywópóe hedânho t'owa t'ähkígi' i shánkí p'ó'dédí? namúnídí, in ho dichuu'ingí'-á hedá in wa'di diwówayi'ingí'-ádí. ¹⁰ Hediho wí' wänbo wí'únk'óepí unbí tí'úuwin páadé'in bîntuṣúu'ami'in, hedi wí'únk'óepí íchanpúwí'in undá inbí shánkí híwó'nin ímuu'in. Wáy wí thaa wänbo na'in t'ähkí Yôesivi páadépiye? gikwinudée-í, hedi ihaydi i-ânho natúní ta'gendi háawin gimuu'in. ¹¹ Kinnân Yôesivi ta'nin diwe nata'muu:

“Ta'gendi naa owówayi'” kin natú Na'inbí Sedó,
 “hedi ta'gendibá t'ähkí t'owa naví páadépiye?
 dívidé'gendikwokhâymaa,
 hedá t'ähkídíbo-á ditugít'óe naa-ânkun
 ta'gendi Yôesi omuu'in.”

¹² Hedi nã'i hí' natu'da? na'in t'ähkí gínkhây'ä? Yôesi âytu'ami'in háa íví'annin hedá háadí íví'annindá.

¹³ Hedânkun wíyá ívítuṣúu'âamívi'wedi,
 íví'ánshaamääní hääwí wänbo wí'ívi'ámipí'in

na'inbí tí'ûu páadé'i' óet'aywó'kannamí'i'.
 14 Na'inbí Sedó Jesus-ádí omuudiho naa dinta'gendihanginná hääbo wí'bo wíngkhâak'óepí'in, hewänbo wí to'wí wí hääwí igí' ûnkhâak'óe'in nachanpóedáho', hedân ta'gendi hä'i hääwí-áho ûnkhâak'óe-ákun. 15 Gá kinnân: Hääwí bînk'oe'i namuudi unbí tí'ûu páadé'i bînháachanmáadího', háa úví'o'indáho nakeepuwagít'óe ta'gendi wíwînséegíhonpí'in. I hääwí bînk'o'idân wíyá to'wíwí wówátsi wíwînpedee'amípi, igí' Christ nachuudi. 16 Tobáháa híwó'gí úví'o kin íchanpo' wänbo', hääwí úví'o'i yanáki namuu gin t'owa ditúdáho', wíyá wí'úví'âamípi. 17 Yôesigí' na'inbí wówátsi âyhondáho hääwí koegí'-á suwägí'-á namuu í'gedida' wí'íví'ánshaamáapi, hewänbo nã'i' í'gedân: I Yä'dâa'i P'oewaahâadi na'in díkhäge'máa in ta'ge'in p'óegé í'ge gimú-ídí, hedá tsaaginpidíbo-á na'inbí wówátsi-á âyhon, hedá híhchandá âymáa. 18 To'wí kí'bi namuu'i Christ-gí' it'ôe'o'idá Yôesi óehíhchanmä' hedi t'owa-á wá' ditúni híwó' i'o'in.

19 Hedânkun nää-á ívísó'dêe-í íví'amídi i hääwí díkhäge'do'i na'inbí wówátsi wé'ge sa'wó'gí âyhúuwídí, nã'i hääwídíba díkhäge'namí wí'nã táye na'inbí whäyu ívíkay'amídi. 20 Hääwí íwânpikoeda'díbo wíwînpedee'amípi háa Yôesi wí to'wígí' i'annin. Hääwí koegí' wänbo wínakhâak'óepí óek'oe-ídí, hewänbo híwó' wínamuupí wí hääwí to'wí ik'óe-ídí, han i'odá wíyá to'wí-á in ta'ge'in p'óegédí óehänge'odi. 21 Shánki híwó' namúni wíwînpívík'oe-ípi háa

wívînmeenasuwă-ípi háa wiyá hăäwí unbí tí'ûu páadé'i' in ta'ge'in p'óegé iwedi óehânge'o'i wí'úví'amípi.

²² Tobáháa háa nă'i hăäwí i'gedi wí to'wí nachaa wänbo', i-ádi Yôesi-áđida' dănkhat'ă' dănhanginnáni'in. Wí to'wí híwó' i'o gin ûnchanpo'di, hedá tí'úugéda híwó'pí i'annin wínachanpóepídi, i-á nahíhchaa. ²³ Hewänbo wí to'wí wí hăäwí ik'oedáho', hewänbo wí'ûnkoedihanginnáhpí híwó' namuu'in ik'óe-ídi, Yôesi-á natûni híwó'pí i'annin, gá nă'i to'wí-á ta'gendi wí'ûnhanginnáhpíđân háa híwó' i'annin háa yoe, hedi wí hăäwí íví'odá hewänbo ta'gendi wí'gichanpo'pí híwó' namuu'in kin íví'amídi, hă'indá t'aywó'nin namuu na'ingí'.

15

Wé'ge'in t'owa bínhhchanmăáni, undq'ba yoe

¹ Na'inbí whăyu kay'in gínmuudá gínkhay'ă' in to'wên inbí whăyu kay'in dínmuupí'in âykhăge'nâamí'in, wí to'wídi wiyá to'wíví hé ôntegende waagibá, hedi háa giwănpida' waagida' wí'íví'âamípi. ² Gínkhay'ă' na'inbí tí'ûuwín páadé'inbí'gedi íví'ánshaa'âamí'in hedá ingí' híwó'dá íví'âamí hedânho inbí whăyu dínke'ennídi, ³ gá Christ wänbo-á wí'bo íví'gedida' wí'i'ánshaa'ănpíđân. Yôesi Tádávi ta'nin diwe kinnân nata'muupí'an háa Christ-di óetu'annin Yôesi Tádá:

I yanăkí hí' uví'gedi dívíhée'andi-á
naví'webá dínpówá.

4 Hedí náʼi háäwí Yôesi Tádáví taʼnin diwe hânʼoe dâytaʼnandi-â nataʼmuu hedânho naʼin díháʼamídí âytsíkhaʼamídí i háäwí híwóʼdi Yôesidi naʼingíʼ dínkhâymáaʼíʼ, gá i háäwí iwe nataʼmuuʼidá naʼin díkweewaasenwaatumáadân hedá díkhägeʼdoʼ ívíyääʼamídí.

5-6 Yôesidânho díkweewaasenwaatumáa, hedí tobá háa gínpoʼ wânbo díkhägeʼdoʼ ívíyääʼamídí, hedí idá wovâykhägeʼnamí wáʼwíʼdaʼ waagi unbí píʼná khóʼyé ímúnídí. Kindidiho úvíʼâamí háa Christ iʼan waagibá, hedânho tʼâhkídíbo wéʼge Yôesi Tádá kwʼáayéboʼ óemáʼve-ídí, i-á Naʼinbí Sedó Jesus Christ-ví Tádá ûnmuu.

In tʼowa Hudíyo dimuupíʼin wáʼ Yôesi Tádáví tuu ditʼóe-í

7 Wíʼná táye biséegíhóʼgí. Christ-di un wovâyséegíhógi waagibá, un wáʼ wíʼná táye úvíséegíhûuwí, hedânho tʼowa Yôesi Tádá dâytegé-ídí. 8 Wíʼúnʼóde-ípí náʼin: Christ wí khägeʼdi waagi in Hudíyovíʼwe napówá, tʼowa ovâykeekwʼôenídí Yôesi Tádá-á taʼgendi iʼoʼin háa naʼinbí hehääwin thehtáy pahpáʼin ovâytuʼan waa ikhâymáaʼin, 9 hedá wáʼ Christ wí khägeʼdi waagi napóe hedânho in Hudíyo dimuupíʼinbíʼpiyeʼ naʼiyapoʼdi indá Yôesi Tádá kwʼáayéboʼ âymáʼve-ídí. Kinnân Yôesiví taʼnin diwe ûntaʼmuu:

In Hudíyo dimuupíʼindádí oyidi naadi wítegé-í,
hedá iwebá dókhaʼwodi uví kháwä
wínkhâyäʼní.

10 Wíyá wáygá kinnân nataʼmuu:

Un Hudíyo ímuupíʼin Yôesiví tʼowa-ádí
bíhíhchanpuwave.

11 Hedá wíyá wáygá wá' nata'muu:

Un Hudíyo ímuupí'indi Na'inbí Sedó bintégé,
un t'owa t'ämäpiye' ówînge'indi báyéki
bintégé.

12 Isaiah wá' kinnân ita'nan:

Wí Jesse-ví ây iwedi'i na'aypuyä'i-á
in Hudíyo dimuupí'ingí' òntsondisogekhâymáa,
hedi i-ân namuu i dâytsíkha'máa'i' híwó' ingí'
ovây'amídí.

13 Yôesi Tádádá na'in díhangin'ândo' híwó'di
dínkhâymáa'in, hediho' iví'piye' úvíwhâyundedi
idibá báyéki wovâyhíhchanmääni hedá
wovâykhäge'namí ánshaa iwe wí'íkwo'nípídí,
hedânho i Yä'dâa'i P'oewaahâädi kay wovâyymääni
hääwí Yôesi Tádádí na'in dínkhâymáa'i' häädi
wänbo t'ähki ítsíkhakwo'nídí.

*Paul-di ovâythayyo' háadí nã'i hääwí i'gedi idi
ovâyta'do'*

14 Naví tí'ûuwin páadé'in, naa-á ta'gendi
dáywhâyunde' undá hânho híwó'nin ímuu'in,
undá Yôesiví khuu i'gedi báyéki únhanginná,
undá únkoedi wí'nã táye úvítumakhe'amídí.

15-16 Hewänbo wáy wí hääwí i'gedi wó'yoegipídí
wâyta'nan hedânho ún'ánpówa-ídí. Kin waagi
wâyta'nan gá Yôesi Tádá naví'piye' híwó'dí
namuudi wên t'ôe dímägidân dáy'amídí, hediho
näa Christ Jesus-gí' dáy't'ôemáa un t'owa Hudíyo
ímuupí'in wâykhäge'namídí. Wí owha' hääwí Yôesi
Tádáví'piye' ihúya' waagibá, naadá Yôesiví híwó'di
tuu in Hudíyo dimuupí'in dovây't'ôe'o' hedânho
indá Yôesi Tádáví'piye' dovâyhûuwídí, hedi

idá ovâyséegíhónde gá i Yä'dâa'i P'oewaahâadi ovâykhäge'nandân ivi'in dimúnidí.

17 Hediho Christ Jesus-ádi wé'ge gamuudi naa dínkoedi naví t'ôe Yôesigî' i'gedi híwó' dáyhée'amídí.

18-19 Hewänbo hääwí Christ-di díkhäge'nán dáy'amí i'gedida'mânho wêda'ginpídíbo dáyhée'amí. Háa otú waagidá háa dáy'an waagidá, hedá i t'ämägi' pínán t'ôe i Yä'dâa'i P'oewaahâadi díkhäge'nandi dó'amídí namuudá, in Hudíyo dimuupi'in t'owadi Yôesi óe'a'gindo'. Hediho Jerusalem búu'ú iwedi oe Illyricum nangepiye' t'ämäpiye' omändi ná'i híwó'di tuu Christ-ví'gedi dovây't'ôekanhon. 20 Häädi wänbo t'ähki wáy Christ-ví'gedi wídit'oe pí eeyeda' naa dáysó'dinde ná'i Yôesivi híwó'di tuu t'owa dovây't'ôe'amídí. Wáy wiyá to'wí naví páadébo ipúupaa iwebá naa wó'da'pí wí hääwí dópaa-í'in, 21 hewänbo háa Yôesi Tádávi tã'nin diwe ûntã'muu waa oda' napúwí'in, kinnân:

To'wên wa'di to'wídí wänbo Yôesivi'gedi ovây't'ôe'anpí'indá dínthaypúwí,
in to'wên wa'di ivi'gedi dit'oe pí'indá dika'pówí.

Paul oe Rome-piye' napunda'

22 Hediho kin dáy'odi hânho dínwó'nândi wa'di wí dínkoedipí unbi'piye' omú-ídí. 23-24 Hewänbo nää-á naví t'ôe t'ähki nängé donbowa, hedi báyéki paayo wâymuní'in oda'di nää-á ma'di unbi'piye' omú-í. Oe Spain-piye' ophademändibo' oda' wâymuní'in, hedá wí háyú yâadi undádi o'ádâachá'ní hedi ihaydi naa oda' undi díkhäge'nami'in eepiye' omú-ídí. 25 Hewänbo

nää-á oe Jerusalem-piye' omän wí hääwí in Yôesiví t'owa iwe'in dovâyhûuwídí, ²⁶ gá in Macedonia-ádí Greece-ádíwin méesate'in t'owa wí chä' dâywé'ge'amídí díví'ánshaamägidân, in to'wên Yôesiví t'owa sehkanäwó' diwówáyí'in oe Jerusalem dimuu'in ovâymäänídí. ²⁷ In Macedonia-windá in Greece-'indádí wí'bo ditú híwó' namúní kin díví'amídí, hewänbo ta'gendi hääwí in Jerusalem-'in dínphaamuu'i' ovâywáywá'ánde waagibá díví'o', gá in Hudíyo dimuu'indi páadé in Hudíyo dimuupí'in ovâyymúđân i híwó'di hääwí Yôesi Tádádí inbí hâagí' ovâymagí'i', hedí nää-á in Hudíyo dimuupí'indá dínkhây'ä' ovâyymú-í'in i hääwí in Hudíyo dimuu'in dín táy'i híwó' ovâykhóekhúumäänídí. ²⁸ Nää'i t'ôe dínbowadee ihaydi i chä' in Jerusalem-'inbí mange dovâykándí, iwedi oe Spain-piye' omän, hedí ihaydá dáywóyí'ní wâymúnídí. ²⁹ Naa dínhanginná owáy unbí'we opówá ihaydá báyékí híwó'di hääwí Christ-ví'wedi wâyoe'amí.

³⁰ Tí'úuwin páadé'in, unbí whäyü Na'inbí Sedó Jesus Christ-ví'piye' únmuudi hedá in séegí i Yä'dâa'i P'oewahâadi na'in dímägi'in namuudá, kaygi'di naadi wâyda'máa Yôesi Tádáví'piye' pín ta'ge haydi dînyûusu'amídí, naa wí'bo wâyûusu'o waagibá. ³¹ Úvíyûusu'amí hedânho in Judea nangewin t'owa Yôesi óe'a'gindopí'indi bahpíbo naa díphademääní, hedá Yôesi Tádáví t'owa oe Jerusalem-windá in khäge' dovâyhonnin híhchandi dâyséegí'amí. ³² Hedího Yôesi Tádá natúdáho unbí'we híhchandibo opówá-í, hedá undádí

oʻʻan dihaydi dīnkoedī-í dáykaykhanwówáʻamídí.
 33 Yôesi Tádádí naʻin díkhägeʻdoʻ áns Haaginpidíbo
 gikwóʻnídí, ibá un tʻähkí-ádí nachaʻní. Hamán.

16

Paul-di in méesateʻin t'owa ovâysengitumáa

¹ Naa odaʻ naʻinbí tíʻúu páadéʻi Phoebe bīntáa-
 íʻin, I-á i Cencrea búuʻúwi méesateʻi khägeʻdi na-
 muu. ² I-á Naʻinbí Sedóvíʻ únmuudi binséegíʻan,
 Yôesiví t'owa dínkhâyʻäʻ waagibá, hedá hääwí i
 úntáydá, häʻi únkwiʻóʻ diwedi bīnyámú-í, gá idá
 báyéki t'owa ovâykhägeʻnandán, hedá naa wáʻ
 díkhägeʻnan.

³ Priscilla-ádí Aquila-ádí naví sengituu-á
 dovānsan, indá naa-ádí Christ Jesus-gíʻ ívitʻôeʻan.

⁴ Indá dakhâymuu inbí wówátsi dānmāānídí
 naa bahpíbo opúwídí. Hediho dovānkúʻdaaʻoʻ,
 hewānbo naadiḍaʻbá yoe, tʻähkí in Hudíyo
 dimuupíʻin méesateʻindi wáʻ ovānkúʻdaaʻoʻ.

⁵ Hedá in t'owa inbí tewhá ee dívíwéʻgeʻoʻin Yôesi
 óeʻaʻginmāānídí, in wáʻ bīnsengituuʻāmí.

Hedá náʻin wéʻgeʻin t'owa wáʻ dīnsengituuʻāmí:
 Epanetus, naadi dóséegíʻiʻ, i-á oe Asia nange
 i páadéʻi Christ-víʻpiyeʻ iwhäyuʻi namuu,

⁶ hedá Mary-á, hānho ungiʻ itʻôeʻoʻi namuu,

⁷ hedá Andronicus-ádí Junius-ádí naví
 t'owa dīnmuuʻindá. Naa-ádí indádí wéʻge
 gipankwʻonwān, hedi Yôesiví tʻôekhuwaʻindi híwóʻ
 ovāntaa. Indá naví páadébo Christ-víʻpiyeʻ
 dānwhäyu.

⁸ Hedá Ampliatus-á wáʻ dīnsengituuʻāmí,
 i-á dóséegí hedi i wáʻ Naʻinbí Sedóvíʻpiyeʻ

iwhäyunde?, ⁹ hedá Urbanus-á, i-á na?indáđi Christ-gî? it'ôe'an, hedá Stachys-á, i-á dóséégí, ¹⁰ hedá Apelles-á, nakeepo? i-á ta'gendi Christ-vî? ûnmuu'in, hedá Aristobulus-ví k'aygi'indá, ¹¹ hedá Herodion-dá, i-á naví t'owabá dînmuu, hedá in to'wên Narcissus-ví k'aygi'in diwedí Na'inbí Sedóví?piye? dívíwhäyunde'indá.

¹² Hedá wá? dînsêngitu'âamí Tryphena-áđi Tryphosa-áđi, indá Na'inbí Sedógî? hânho dânt'ôe'o?, hedá Persis-á, i-á dóséégí, hedá i wá? Na'inbí Sedógî? hânho it'ôe'an. ¹³ Rufus-á wá? dînsêngitu'âamí, i-á Yôesíđi óede?mandi? namuu, hedá iví yíyá-á, naví yíyá waagibá dóchaa. ¹⁴ Dînsêngitu'âamí Asyncritus-á, Phlegon-dá, Hermes-á, Patrobus-á, Hermas-á hedá in tí'ûuwin páadé'in indáđi diyí'indá. ¹⁵ Hedá wá? dînsêngitu'âamí Philologus-áđi Julia-áđi, hedá Nereus-áđi hedá i kwee iví tí'ûu ûnmuu'i-áđi, hedá Olympas-á, hedá t'âhkí in wé'ge'in Yôesiví t'owa indáđi diyí'indá.

¹⁶ Wí'nă táye úvíséégísêngitu'âamí. T'âhkí Christ-ví méesate eeyewin t'owa t'âmâpiye? dikw'ó'nindi wovâsêngitu'o'?

Paul-di ovâytumáa dívípi'âyîngi'amí'in

¹⁷ Tí'ûuwin páadé'in kaygi?di wâytumakhemáa, in to'wên wovâywiye-í'in hedá in ta'ge'in p'ôe iwedí wovâyhänge'amí'in dida'inbí'gedí úv'âyîngi'amí, indáho hăäwí íhâhpóe'iví'wedí wíyá piháawi wovâyhá'o'. Inbí'wedí úvívâa'amí. ¹⁸ Kí?min t'owa-á Na'inbí Sedó Christ-gî? wíđívít'ôe'opí, hewänbo ingí'da? háa dida? waagi dívíwänpi'o'. T'owaví'gedí dívíhí'máađi inbí hí? sa'wó?

dínt'œt'œe, hewänbo kindidi in to'wên ihay ka'powa dâymáapí'in ovâyhœeyó'o'. ¹⁹ T'ähkí t'owa dínhanginná undi Yœsi bîn'a'gindo'in, hediho naa ohíhchaa han úví'odi. Hewänbo naa oda' in hangintan bînmá've-i'in hedânho únhanginnánídí wé'i wí híwó'di namuu'in hedi iwediho t'aywó'kanhá'in ímúnípídí. ²⁰ Yœsi Tádádí na'in díkhäge'do' ánsshaaginpídíbo gikwo'nídí, hedi idibáho háy napœe ihaydi Penísendiví kay ônhánú-í hedânho undi bînt'áanídí. Christ-ví séegísehkanä-á bînmá've-í.

²¹ Timothy naa-ádí Yœsigí' it'œe'o'idi wovâysengitu'an, hedá Lucius-á Jason-dá hedá Sopater-á naví t'owa dînmuu'indi wá' wovâysengitu'an.

²² (Naa Tertius omuu'i' dótã'do háa Paul natú'in, hedá naadi wá' Na'inbí Sedóví' omuudi wâysengitumáa.)

²³ Gaius-di wá' wovâysengitu'an. Naa iví k'aygi o'än, iwebá t'ähkí in Jesus-ví'piye' dívíwhäyunde'in ná'i búu'úwin dimuu'in dívíwé'ge'o'. Hedá Erastus-á ná'i búu'úwi chã' i'áyí'do'idi wá' wovâysengitu'an, hedá na'inbí tí'úu páadé'i Quartus-di wá'.

²⁴ Na'inbí Sedó Jesus Christ-ví séegísehkanä bînmá've-í t'ähkídíbo'. Hamân.

**Naʼinbí Sedó Yôesiví Tʷʷ / Nanbí Sedó Jôesiví
Tun**

New Testament in Tewa (USA) (San Juan/Santa Clara)

copyright © 2012 Wycliffe Bible Translators, Inc.

Language: Tewa

Translation by: Wycliffe Bible Translators

Contributor: Wycliffe Bible Translators, Inc.

Naʼinbí Sedó Yôesiví Tʷʷ (San Juan)/ Nanbí Sedó Jôesiví Tun (Santa Clara)

Copyright Information

© 2012, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tewa (USA)

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 4 Mar 2023 from source files dated 29 Jan 2022

f775bf1b-8c8a-5c5e-9288-3b9b00387997